


柳田文庫  
文庫11  
D 289  
9



文庫11

D 289

9

元書卷三十九

邵陽曾廉謨

太祖四王列傳第十四

太祖子六人光獻翼聖皇后生朮赤太子察合台太子太宗皇帝拖雷太子諸后生兀魯赤闊列堅太子兀魯赤無嗣

朮赤太子亦曰拙赤言長子也太祖子惟朮赤長故名焉太祖建帝號之二年命將右手軍往征林木中百姓所謂斡即者也朮赤性卞急驍勇善戰既受命則以斡亦刺人忽都哈別乞爲鄉導至失黑失惕斡亦刺禿巴思諸種皆降遂抵乞力吉思其酋以白海青白驃馬及黑貂獻焉更北畧地自失必兒以南悉收林木中百姓而還七年從太祖伐金明年復伐金攻山後燕東河東收其州郡十三年吐麻叛徵兵於乞力吉思不應太祖復使朮赤討之師

010190563958

順謙河而北遂降乞力吉思並撼哈納烏斯客思的迷諸部火因  
意而干皆屬焉火因言林木意而干言百姓也十四年太祖親征  
西域朮赤別將攻下養吉干八兒真等城其秋復渡阿母河攻玉  
龍傑赤破之十七年哲別速不台征欽察命受朮赤節度初太祖  
本欲立朮赤爲後以朮赤與察合台有違言因定以窩闊台爲嗣  
其攻玉龍傑赤也朮赤與察合台異志軍心益懈師久無功於是  
帝乃使朮赤察合台並聽調於窩闊台城乃下然太祖寶器朮赤  
欽察平卽留朮赤王之後並王斡羅思康里阿速諸地地周數萬  
里都阿里吉河上撒耳柯思康里故都也朮赤以病不朝亦會有  
譖之者太祖亦怒朮赤尋薨太祖乃罪譖者而痛朮赤子七人拔  
都嗣太宗八年分朮赤後食平陽四萬一千戶十年又益以眞定  
晉州萬戶至元十八年又分以江南永州六萬戶

拔都大王亦曰八都曰巴秃亦稱拔都罕亦曰八都罕太祖征西  
夏破沙州以隸拔都旣嗣欽察王位太宗七年受命與貴由太子  
蒙哥大王討西域之未服者遂盡平欽察斡羅思及孛烈兒十三  
年斡羅思復梗命天子申命拔都帥兵五十萬征之破秃里斯哥  
城斬其酋也烈班諸部大定遂討馬札兒五道並進破其國定宗  
元年復征孛烈兒徇地至乃捏迷思拔都凡數總大軍征西域皆  
有大功其國地絕遠太宗崩皇后稱制拔都來會於只兒河奉定  
宗卽位定宗崩皇后立失烈門而聽政忙哥撒兒兀良哈台欲立  
憲宗復會於阿剌脫忽刺兀拔都亦與焉憲宗五年拔都薨弟撒  
里答嗣撒里荅薨弟忙哥帖木兒嗣忙哥帖木兒亦曰拔都忙哥  
帖木兒方嗣位而海都叛世祖命平陽達魯花赤鐵連使海都先  
詣忙哥帖木兒計事鐵連至忙哥帖木兒曰祖宗有訓叛者誅帝

行天罰我卽外應也於是怵哥帖木兒嚴爲備海都爲少戢未幾而薨弟脫脫蒙哥嗣脫脫蒙哥薨弟脫脫嗣自拔都薨後嗣王三皆不得久其位脫脫者亦曰篤哇曰土哇曰朵瓦曰篤娃曰篤蛙曰都哇曰朵哇自以爲太祖之嫡不得君天下意甚怏怏於是與海都交相結至元十二年篤哇遂與卜思巴舉兵反犯別失八里威遠王阿只吉及皇子奧魯赤禦之篤哇師銳戰而勝遂圍駙馬高昌亦都護火赤哈兒於火州凡六月火赤哈兒與以女始解去事具畏吾兒傳其後駐軍按台山北屢犯邊二十三年復與海都同趨別失八里爲伯顏所敗大德五年武宗鎮按台山篤哇與牀兀兒玉哇失阿失戰不勝膝中矢焉已而海都又死於是篤哇孤乃與察八兒明里帖木兒謀歸朝曰我太祖創業至艱子孫日構兵相殘是自隳祖宗之業也八年遂與察八兒同遣使入朝十年

復遣其子寬徹賀聖壽節武宗立以篤哇首善封爲甯肅王尋薨以弟伯忽嗣欽察王而寬徹領其眾仍駐按台山其歲太師月赤察兒上言篤哇先眾請和今雖死宜厚撫其子寬徹使不我異從之旣而察八兒欲與同變寬徹拒之寬徹亦曰欵徹亦曰寬闍至大二年詔以其父甯肅王駝紐金印賜焉天祿二年進封肅王換獸紐印至順元年置傅尉司馬各一人伯忽爲欽察王延祐元年薨月卽別嗣自撒里荅崇回回教世相仍以月卽別故亦號其國曰月卽別或又以爲月祖伯云月卽別薨子札尼別嗣札尼別亦曰札你別至正十三年獻大撒哈刺察赤兒米密兒弓刀鎖子甲青白西馬二世皆雄傑揚國威焉

論曰仁宗紀延祐元年諸王脫脫薨月思別襲位泰定紀言諸王月思伯遣怯烈來朝地理志西北地有月祖伯月思別月思伯月

元書 卷三十九 三  
祖伯月卽別一也其遣使來朝在至治三年而朮赤傳言至元二  
年月卽別來求分地歲賜至大元年月卽別薨何互異耶以脫脫  
寬徹封年驗之紀爲允矣然朮赤之薨在太祖末至至治時將及  
百年豈其子有猶存者耶又何樊祭昧札之皆允恭克讓也別記  
稱篤哇爲拔都子殆其然耶至大三年察八兒寬徹來朝牙忽都  
言拔都罕之裔首已附順是卽謂篤哇寬徹也而代篤哇者爲伯  
忽伯忽始傳月卽別篤哇之薨在至大元年延祐元年蓋伯忽薨  
而月卽別襲其位也自史記言虞夏殷周之先世人猶不能無疑  
况元人載籍不詳者乎別記又言朮赤子十四人有斡兒朵別兒  
哥昔班皆見於紀傳而表不書又言朮赤後分欽察諸地爲四汗  
其語殆未可據然元制諸王子孫皆各有分地朮赤諸子之相嗣  
爲一王恐不然矣姑錄之以俟攷焉

察合台太子亦曰茶合解亦曰茶合帶亦曰察阿歹太祖伐金伐  
西域常偕其兄朮赤弟窩闊台將一路軍獲地多焉太祖旣定西  
域以朮赤察合台分王之察合台都斡端途魯吉城斡端古于闐  
也故亦號于闐王地枕山帶河河產美玉桑麻禾黍宛然中土其  
疆西踰葱嶺大鹽池西阿母河南北皆隸焉東與河西及也兒的  
石接南際土蕃北踰亦列河先時西遼故地察合台盡有之畏吾  
兒哈刺魯皆其所鎮撫也察合台之國命從博爾朮受教察合台  
能納善不自矜張太祖崩察合台來會於怯綠連河先是國俗尊  
屬朝會用家人禮不拜太宗卽位察合台從耶律楚材言拜焉遂  
定朝儀太宗尋尊察合台爲皇兄鑄寶以授五年興州楊買驢附  
趙興祚反察合台帥師同按只吉歹討之破之於險樹寨盡翦其  
餘黨八年分食太原四萬七千戶十年益以眞定深州萬戶十三

年薨子曰也速蒙哥王曰合剌旭烈大王也速蒙哥嗣王于闐亦曰也速忒可亦稱也速不里不里火者亦省稱不里憲宗立大會諸侯王也速蒙哥後期不至憲宗遣不憐吉解帥兵備之也速蒙哥因陽言來朝而與野里知吉帶等謀以兵入宮禁事覺被禽後放之沒脫赤事具忒哥撒兒傳於是憲宗立合剌旭烈復王于闐二年合剌旭烈薨子四人曰阿魯忽大王曰八剌大王曰威遠王阿只吉曰肅遠王帖木兒不花阿魯忽亦曰兀盧嗣于闐王位然黨於阿里不哥世祖使薛徹干等使于闐通好焉阿魯忽留不遣帝命不花帖木兒征之阿魯忽歸國與大名王禾忽破哈刺不花之眾於不剌城復與阿里不哥大王戰於亦思寬河失哈里及渾八升皆失利後復勝之已復貳於海都帝命劉恩也罕的斤征阿魯忽海都援之帝諭斡端哈兒哈失押兒牽三城無從亂尋諸王

合班元帥忒古帶以軍至阿魯忽戰不勝乃降其後天祿時西臺御史大夫乃蠻台奉命送察合台皇兄舊寶於其後嗣燕只哥解燕只哥解亦曰燕只吉台泰定時襲位者也至順元年朵列帖木兒襲位朝廷遣諸王篤憐渾禿孛羅往使賜以銀幣朵列帖木兒亦曰禿列帖木兒亦曰篤來帖木兒自是亦稱其國曰篤來帖木兒云明年答兒蠻復襲位三王史皆失其世

八剌大王亦曰水八剌亦海都黨也至元十二年追還金銀符子曰買住韓至大三年封克王賜金印獸紐

威遠王阿只吉分地初在山丹世祖立同合丹率西道諸王勸進封威遠王時合丹自別失八里復還舊帳別失八里空虛乃徙阿只吉鎮之亦以其爲察合台封內地也朝廷爲其民遠遷賜馬牛車幣焉及篤哇反阿只吉及西平王奧魯赤帥師三十萬禦之敗

續自是海都篤哇數擾別失八里阿只吉既新徙帳又頻敝於寇故常窘困天子數有賜予敕有司厚振其民阿只吉不能自振戰亦無功然性謹厚未嘗與阿魯忽比帝嘉焉於是乃詔伯顏代總其軍仍命阿只吉王官屬統治留務是時以江南平益分澧州六萬七千戶給察合台後大德中阿只吉遂東駐所食太原然以擾民間詔屢詰責之仍歲賜之糧鈔命王自今出獵悉自供具至治初薨子二人曰威遠王忽都帖木兒曰赤因鐵木兒赤因鐵木兒嘗從伯顏討海都忽都帖木兒至治三年襲封始賜銀印駝紐焉子曰越王秃刺

越王秃刺少以勇聞成宗崩左丞相阿忽台圖立庶藩仁宗謀誅之而憚阿忽台多力秃刺縛阿忽台誅焉武宗卽位封王越以紹興爲食邑賜金印獸紐然秃刺猶怨望至大元年秋武宗幸涼亭

將御舟秃刺前礙之帝曰朕欲登舟秃刺曰人有言一箭中麋無自能百兔未得難遽止蓋國俗儕輩相靳語也由是帝銜焉既而大宴萬壽山秃刺醉解其帶瞋日向帝曰爾與我止此耳二年春遂誅之子二人豫王阿刺忒納失里弟西安王答兒麻

豫王阿刺忒納失里以至大三年坐與甯王闊闢出倡西僧鐵里等謀不軌竄漠北秦定帝卽位流徙諸王同徵還居京師致和元年秦定帝崩阿刺忒納失里及燕鐵木兒發兵納懷王而拒天順帝於上都事在文宗紀阿刺忒納失里以預秘謀首封西安王賜金印駝紐其歲進豫王天祿二年換獸紐印食邑南康復以其父越王舊印賜焉阿刺忒納失里起自竄徙以胡戴功宗王恩寵無與爲比帝又以心腹任之特命出鎮雲南以防反側至順元年阿刺忒納失里未行而雲南諸王秃堅萬戶伯忽等據中慶詔阿刺

忒納失里帥師出入番以擊之賜豫王王傅官金虎符二年雲南平徵還至正十二年命討襄鄧南陽之賊十五年命與陝西平章政事搠思監從宜商議軍事十六年汝潁紅巾陷潼關阿剌忒納失里帥師再復之頗著威望明年命分道討關陝時李思齊張良弼殺王官而併其軍阿剌忒納失里不能制十八年詔徙駐白海尋遷六盤其後明徐達自臨洮下蘭州阿剌忒納失里北走部落輜重皆爲虜焉荅兒麻至正十三年以征南陽功襲其兄前所封西安王鎮寵吉兒

肅遠王帖木兒不花至元二十八年封賜金鍍銀印龜紐子南荅失里王亦曰南荅失至治元年給王府官銀印

拖雷太子幼時塔塔兒人潛入其帳將加刃焉博爾忽妻及者歹者勒蔑挾之而免太祖伐金嘗挾置左右戰則摧鋒其伐西域也

拖雷別將收忽羅珊馬魯四城明年克徒思匿察兀兒大掠木剌夷渡搠搠闌河克也里遂從太祖攻塔里寒寨拔之太祖崩太宗在北陲拖雷監國二年是時國有大喪新君未立號令皆出拖雷而耶律楚材爲之佐然燕京盜賊方乘間竊發白晝掠財於市吏不能禁也拖雷乃使耶律楚材及塔察兒往治之爲誅十六人盜始息焉太宗既來會喪拖雷迎見之於忽魯班雪不只遂大會諸王大臣立太宗明年從太宗伐金三年拖雷用降人李國昌計請假道於宋以伐金太宗然其策已而宋人殺假道使者拖雷遂破宋沔漢上諸城隘進侵金唐鄧明年大破其師遂與太宗會攻汴金人請和乃從太宗北還事具太宗紀其戰於禹山也金人殊死戰師小卻以避之既而大霧金人懼不敢追俄而霧開則知師退已臨絕澗賴霧免擠焉時以爲有天助云拖雷既北還其夏太宗



在官山有疾拖雷禱天地請以身代爲取巫覡祓釁之水飲焉太宗尋瘳九月行還龍庭至阿刺思的拖雷薨子十一人長憲宗皇帝次世祖皇帝其九人曰忽覲都史佚其事曰旭烈兀大王曰阿里不哥大王曰撥綽大王曰末哥大王曰歲都哥大王曰雪別台大王二人失其名太宗八年命拖雷克烈妃分食眞定八萬戶至元三年丞相安童伯顏請定祖宗諡號乃尊爲睿宗景襄皇帝十八年復分江南撫州十萬戶與睿宗諸王焉

旭烈兀大王亦曰吁里兀亦曰煦烈少而英毅太宗時破馬札兒國五道出師旭烈兀領其一焉憲宗始立以親弟命伺察失烈門動靜二年命征西域素丹諸國未行明年并命征哈里發旭烈兀以郭侃爲將凡六年凡回回諸國皆破降拓地西踰於海事在郭侃及西域傳八年憲宗詔卽以旭烈兀王西域號波斯王王都曰

八哈刺因弗利刺河經其地其西復一河注焉而南流入於海八哈刺因正當雙河之交水陸衝衢商旅所萃昔波斯王宿利城在焉其北際小海北大山與欽察王鄰東北與于闐王鄰東有欣都思西臨海曲與富浪接而南臨大海海中東南有小島循海行可至俱藍馬八兒東近欣都思有僧伽刺國古師子國也多產名藥瓊貨旭烈兀所王幅員萬餘里而珠璣貨貝羽齒蹄躑之屬充物盈溢富莫與匹也憲宗又以彰德二萬戶爲之食邑旭烈兀建國一年而憲宗崩乃遣使詣世祖勸進旭烈兀親世祖而非阿里不哥以地遠亦未嘗興兵助順至元二年薨子二人曰阿八哈王曰亦憐眞朶兒只王阿八哈嗣王波斯亦曰阿不合嘗築城於忽魯謨斯人稱爲阿不合大王城者也至元八年朝廷遣使徵礮匠阿八哈以亦思馬因及木發里人阿老瓦丁應詔十五年詔札木合

持十萬金命阿八哈市藥師子國十八年薨子阿魯嗣阿魯亦曰阿魯渾亦曰阿兒渾世祖嘗命塔又兒忽難及愛辭使其國立數年薨子二人曰靖遠王合贊曰廣平王哈兒班荅合贊嗣王波斯二十七年封號爲靖遠合贊沈毅果斷信賞必罰裁驛傳禁暴斂土地日闢善政具備爲西域名王大德八年來貢延祐六年薨其後史失其授受或曰合贊之薨在大德八年傳其弟哈兒班荅初中統二年世祖以隨路打捕鷹房民戶七千戶給旭烈兀立總管府至元十二年阿八哈遣使奏歸朝廷大德八年復爲合贊立都總管府至大四年省尢官朝議以哈兒班荅遠鎮一隅別無官屬存而不廢其封及薨年皆失之其後又有不賽因者泰定元年嘗遣使入朝朝命封其王府臣出班朔國公自後累歲屢有貢獻人亦稱其國曰不賽因文宗之世朝廷命諸儒臣修經世大典以朮

赤後月祖伯察合台後篤來帖木兒並旭烈兀後不賽因列爲西北三藩著其屬地於圖云至正末國爲駙馬帖木兒所奪並據篤來帖木兒以辭迷思干爲都焉自是國曰撒馬兒罕矣亦憐眞朶兒只王子脫脫木兒脫脫木兒孫曰亦憐眞八的或曰明宗所封亦憐眞八爲柳城王賜金印螭紐者也

論曰前史表哈兒班荅之子有幽王出伯出伯之子曰幽王喃忽里然哈兒班荅君西域在至大時而世祖紀載出伯在至元二十一年已賜印又紀於是年言從諸王朮白忒古帶請賞也忒古銀鈔以旌戰功朮白又卽出伯之同聲實一人也若如表世次出伯爲旭烈兀之元孫而旭烈兀實世祖母弟其時世祖年七十歲旭烈兀少之豈得遂有元孫足任爵位更握兵柄者乎嗣是二十五年敕駙馬昌吉諸王也只烈乞兒哈丹二千戶從出伯北征逾二歲

元書 卷三十九 九  
出伯及諸王伯荅罕亦憐真等擊章吉於甘木里走之元貞元年命節制北庭都元帥曷伯之師大德八年屯田僻出合出谷就封爲威武西甯王賜金印駝紐十年命領甘肅軍站事明年進幽王換獸紐印至大元年來進玉二年中書言甘肅僻遠城中舊積金穀供軍近撒的迷失擅興甲兵掠幽王出伯輜重民大驚擾雖卽伏誅宜修城池毋啟寇心從之諸所言皆與合贊哈兒班荅同時用事出伯久總邊兵受賚甚渥殆是哈兒班荅兄若弟而留鎮甘肅者耶別記言不賚因爲哈兒班荅之子或不誣矣喃忽里以延祐七年襲封幽王亦曰南木忽里亦曰那木忽里亦曰納忽里其分地在哈密力後至元二年以甘肅白城子屯田賜之喃忽里繼父總兵甘肅薨其後安克帖木兒嗣以居甘肅亦號爲肅王元終降於明而元統時復有威武西甯王阿哈伯子亦黑黑赤襲封父

爵錄此以記旭烈兀別派焉

阿里不哥大王亦曰外刺憲宗之立實與末哥首謀推戴而主以拔都以爲宗盟長也然憲宗甚親愛世祖盡付以漠南地阿里不哥心忌之孛魯合憲宗初歲爲大必閣赤掌機密及阿藍荅兒劉太平皆其黨也於是讒之於憲宗阿藍荅兒劉太平遂行省京兆立鉤考局欲盡取世祖所置吏而甘心焉世祖盡室歸朝乃已及憲宗伐宋欲以世祖居守和林世祖懼奏言欲從征於是阿里不哥留守會憲宗崩阿里不哥謀叵測阿藍荅兒急使脫里赤發漠南北兵而世祖已自鄂還燕明年三月世祖卽位布告天下逾月阿里不哥乃稱皇帝於和林孛魯合爲阿里不哥畫策臣遂分布腹心易置將佐散金帛賚士卒以劉太平及霍魯海復行省關中拘收錢穀要結秦蜀而六盤守將渾都海挾精兵阿藍荅兒南來

元書 卷三十九 十一  
欲合其眾而東世祖乃詔徵兵三萬人駐燕萬五千人守開平命諸路市馬萬匹戰襖裘帽各萬計米十萬擔輸開平撫靜以充軍實以鞏昌總帥汪良臣守沿河隘立望雲驛專達軍事阿里不哥勢不得逞既而劉太平之黨皆爲京兆宣撫使廉希憲所殺事具希憲傳帝遂自將擊阿里不哥而阿藍荅兒渾都海亦皆敗死於甘州於是阿里不哥勢益孤明年遂傾眾南來帝復北討詔鄭江將千人赴開平董文炳率善射千人出魚兒灤李伯祐以餘兵屯潮河霍木海乞帶自得勝口至燕京備糧芻復命塔察兒將萬人出古北口及董文炳會行在遇於昔木土腦兒合丹哈必赤大王斬阿里不哥將合丹火兒赤復與塔察兒國王分兵奮擊阿里不哥之眾遂大潰其部將多降阿里不哥遂北遁世祖乃引還既而阿里不哥復西出與阿魯忽大王戰亦未能勝其後阿里不哥以

憲宗子阿速歹玉龍荅失昔里吉諸王及其謀臣孛魯合忽察禿滿阿里赤脫火思自歸於上都帝念懿親釋不問而以孛魯合等構亂皆坐誅俄命以太后所食眞定戶悉予阿里不哥尋薨既而復並予以撫州食邑子三人曰威定王玉木忽爾曰乃刺忽不花大王曰刺甘失甘大王

威定王玉木忽爾亦曰雙木忽兒亦曰要木忽兒亦曰藥木忽兒亦曰約木忽兒亦曰要忽兒亦曰岳木忽世祖念親親阿里不哥歸不問王玉木忽爾心終未善也會河平王昔里吉以憲宗子不得立怨世祖王玉木忽爾與之比至元十三年遂附昔里吉及太宗子滅里大王等攻北安王那木罕於阿力麻里明年復從昔里吉執那木罕及右丞相安童事在昔里吉傳二十六年王玉木忽爾復犯邊明年牙忽都王妻孛輜重悉爲所掠去大德元年始與兀魯思

不花來朝河南平章政事博羅歡奏曰此輩幼弱過皆在其父請  
棄其前惡以勸未至帝然之又命增其歲賜賜和林屯田三年封  
爲定遠王賜金鍍銀印龜紐九年改封威定換駝紐金印薨  
乃刺忽不花大王子四人曰邠王孛顏帖木兒曰完者帖木兒王  
曰冀王孛羅曰定王藥木忽兒孛顏帖木兒亦曰不顏帖木兒亦  
曰卜顏帖木兒至順元年請給鞍馬從諸軍征雲南明年雲南平  
封邠王賜金印獸紐其歲命邠王孛顏帖木兒圍獵於撫州視其  
食邑三年命甘肅行省爲建居第幽邠一也自是甘肅有兩幽王  
焉孛羅初以罪謫四川八刺軍中自效大德七年以立功徵詣京  
師十年封鎮甯王賜金印駝紐延祐四年進王冀換獸紐金印置  
王傅二員薨藥木忽兒至元中與玉哇失追昔里吉逾金山乃還  
其後復與朶兒朶海玉哇失及牀兀兒擊敗海都將八憐之師詔

從晉王駐防北邊至大元年封定王薨孫曰燕大王

刺甘失甘大王子曰鎮甯王那海亦曰那懷以至大三年封賜金  
印駝紐至順二年命爲立總管府於撫州

撥綽大王庶出也憲宗時常征欽察論功賜號拔都兒七年分食  
眞定蠡州三千三百戶子薛必烈傑兒大王薛必烈傑兒子楚王  
牙忽都牙忽都亦曰押忽秃亦曰牙忽秃年十三世祖卽命襲祖  
父統軍至元十二年從北安王那木罕鎮阿力麻里明年河平王  
昔里吉使人誘之牙忽都不從亂俄而昔里吉玉木忽兒脫鐵木  
兒其發兵攻那木罕生致牙忽都牙忽都謀逃歸昔里吉覺而更  
幽之大爲所困辱及伯顏討昔里吉戰於斡兒寒河牙忽都潛結  
赤因帖木兒土土哈亂其陣昔里吉由是大敗牙忽都得脫歸見  
帝帝覩其須髮盡白閱其忠也賞賚之甚厚十八年益以江南未

元書 卷三十九  
陽五千三百戶又與土土哈征海都牙忽都先進破其軍賜鈔幣  
鎧甲弓矢又命設斷事官牙忽都自少習兵事久屯北方屢扞叛  
黨忠勤日著乃顏反怯必秃忽兒霍台誘蒙古軍二萬附之牙忽  
都夜襲之突入其帳破之二十七年海都兵大至牙忽都軍潰盡  
亾其妻孥及輜重其子朵列帖木兒亦相失獨與十三騎奔還世  
祖益嘉之封爲鎮遠王賜銀印金鍍龜紐妻以宏吉刺氏女資裝  
特豐同時部屬被掠者皆有賜焉尋命掌北安王第二帳王薨命  
掌其大帳固辭成宗立召還侍左右及帝崩牙忽都與誅安西王  
阿難答立武宗由是進爵爲楚王賜金印獸紐置傅以宏吉刺氏  
爲楚王妃又以察八兒親屬賜之至大三年察八兒寬徹來朝牙  
忽都進曰太祖皇帝削平四方南土未定世祖皇帝混一四海顧  
惟宗親未得同堂而燕今拔都裔首附察八兒舉族來歸誠陛下

如天之福也然我太祖皇帝有訓世祖誦之臣與聞焉夫治亂國  
者宜以法齊之所以辨上下定民志也惟陛下幸察之帝嘉納焉  
明年薨子朵列帖木兒亦曰秃列帖木兒武宗撫軍漠北請以從  
行大德五年海都篤哇入寇朵列帖木兒將兵千人擁護先後武  
宗甚悅其後武宗卽位命襲鎮遠王大德四年仁宗立嗣爲楚王  
未幾武宗子周王西出朵列帖木兒坐累奪爵沒其半貲後周王  
立爲明宗詔曰朵列帖木兒何罪徒以我故也其復故封人民貲  
產悉還之朵列帖木兒薨子八都兒嗣八都兒薨子三人曰燕帖  
木兒嗣楚王元統二年爲大宗正府札魯花赤曰速哥帖木兒王  
至正十四年嘗命討宿州賊曰朵羅不花王

末哥大王亦曰木哥亦曰莫哥亦曰摩哥亦曰穆哥憲宗立有推  
戴功七年分食河南五千戶憲宗伐蜀末哥別將出洋州進米倉

關以會於行在得便宜承制行事已而憲宗崩世祖師次江北末哥遣使請早正尊號繫天下心世祖諸弟惟旭烈兀及末哥特相愛故不善阿里不哥而其子孫亦無與於亂世祖卽位乃號爲皇帝末哥大王錫以玉寶尋薨子昌童中統二年封永甯王改其父玉寶爲三臺金印駝紐文如其封子曰伯帖木兒亦曰卜帖木兒嗣永甯王至治三年嘗以罪命宗正雜治其傳薨子伯顏帖木兒亦曰卜顏帖木兒嗣永甯王

歲都哥大王分食濟南五千戶薨子曰速不歹大王速不歹子二人曰荆王脫脫木兒曰哈魯孫大王脫脫木兒亦曰脫帖木兒薨子也速不堅亦曰也先博怯泰定元年嗣封荆王始賜獸紐金印哈魯孫亦曰火魯火孫蓋與於哈丹之亂者其後無聞雪別台大王子孫不王

闊列堅太子亦曰果魯干太宗八年分食河間四萬六千戶子曰河間王忽察以食邑爲號也其分地在甘肅忽察薨子忽魯歹嗣忽魯歹亦曰兀魯帶亦曰兀魯忽帶亦曰兀古帶至元二年封河間王始賜金印駝紐十四年河平王昔里吉煽西道諸王以反獨率屬來歸與伯顏合軍討反者十八年更以江南衡州五萬四千戶給闊列堅後忽魯歹薨子三人曰也不干大王曰八八刺大王曰也滅干大王

也不干大王世祖命與濟南王勝納哈從北安王那木罕防備北邊方駐師塔密兒河而乃顏大王反遣使約也不干勝納哈同舉兵會樞密副使土土哈執其使也不干知事洩乃以其部眾東走趨怯綠連河大帳大帳者太祖行宮也也不干欲據之以應乃顏土土哈欲急攻之諸將欲先奏而後行土土哈曰兵貴神速我出

其不意破之必矣緩則恐難圖也因疾驅七晝夜渡禿兀刺河會駙馬闊里吉思追騎亦至也不干倉卒拒戰於孛恰嶺大敗走免天子以諸王同惡乃罷乃顏益都平灤勝納哈濟南也不干河閒各食邑所署官乃顏死明年也不干入寇而敗後爲揭只揭烈溫達魯花赤荅荅呵兒所禽收其所管欽察之民以與土土哈焉子曰八八大王八八亦曰八八巴亦曰八八把初嘗叛附海都也不干以兵附乃顏八八時已降在甘肅故封至元二十五年也速不花以失烈門叛八八及伯荅罕王會甘肅兵邀之也速不花爲謝罪世祖賜以銀印龜紐子二人曰兀禿思帖木兒王曰合賓帖木兒王延祐四年詔復以八八印賜合賓帖木兒

八八刺大王子曰安定王脫歡脫歡以皇慶二年封賜金印駝紐子朵兒只班嗣朵兒只班鎮西土有勲勞朝廷爲置王傳官四人並賜之印示優寵焉

也滅干大王大德四年賜印明年薨子曰伯荅罕王或曰八八刺也滅干之子也前史成宗紀言大德五年諸王也滅干薨子八八刺嗣則宗室表以八八刺爲也滅干兄殆誤耶又伯荅罕者亦曰拜荅罕亦曰拜荅寒其一人耶紀表皆言以至元七年賜印及海青金符紀又言二十五年掌吉叛伯荅罕遣將追之至八不渾不及而還其歲復與八八刺討叛王失烈門是伯荅罕在至元時已顯著功績若爲也滅干之子則是世祖曾孫行何於其初歲卽早有著見而也滅干乃反後三十年始賜印耶而諸王表載八八刺以延祐元年賜金印駝紐以封年校之其與也滅干爲父子頗似相符然延祐六年言賜諸王八八刺脫脫灰也只里也滅干等八八刺名在也滅干前又似八八刺爲也滅干兄近是也至八八刺



子安定王脫歡其封在皇慶二年又先於八八刺之賜印一年表於安定王下又列朵兒只班於前無封年而列脫歡於後言皇慶二年封似朵兒只班又非脫歡之子也者君子於其所不知蓋闕如也姑仍其舊次錄於篇

論曰太祖欲立太宗則王朮赤察合台於遐裔以大啟土宇雖其志氣之雄亦有以消患於未萌也拖雷篤摯有周公金縢之意而天竟成其志以鍾祥於子孫追王之典比王季宜矣而旭烈兀乃立國和積其後不賽因遂列名三藩與國咸休亦曠古罕聞哉

禹日如 刊

門人曾鴻林襄校

門人曾士琮詳校

元書卷三十九

元書卷四十

邵陽曾廉撰

張柔洪福源汪世顯楊大淵列傳第十五

張柔字德剛涿州定興人也少以豪傑稱金貞祐間嘗聚族黨保西山東流寨以備盜寨人張信納流人女為妻柔鞭信而還其女信患結黨欲害柔未幾信有罪當誅柔救之而免於是壯士多慕義歸柔會苗道潤經畧中都才柔署為定興令累表遷權帥左都監行元帥府事太祖十三年苗道潤為其副賈瑀所殺瑀遣使甘言以致柔柔怒拒之檄道潤部曲會易州軍市川誓眾為復讎適道潤列將何伯祥得其所佩金虎符以獻因推柔行經畧使事太祖出兵紫荆關柔拒戰於狼牙嶺馬蹶被執遂降太祖命仍行元帥事柔遂南下雄易安保諸州破賈瑀於孔山剖瑀心以祭道潤

元書 卷四十一  
尋屯滿城金真定帥武仙來攻大破之乘勝下完州拔郎山祁州  
曲陽諸城寨皆降復單騎降鼓城遂克深澤甯晉安平分兵攻下  
平棘無極欒城諸縣由是深冀以北真定以東皆望風求附一月  
之間與仙十七遇戰輒勝方獻捷於行在次宣德而易州軍叛逐  
其守盧應虜應妻子而據西山馬頭寨柔卽還以計破之誅叛人  
歸應妻子加榮祿大夫河北東西都元帥號拔都兒柔復獲金驍  
將王子昌於信安援史天澤以討武仙於真定分徇河北山東諸  
郡二十一年璽書授行軍千戶保州都元帥明年移鎮保州太宗  
四年從拖雷太子伐金進圍汴京金主渡河欲取衛州柔以兵與  
史天澤合擊金主敗走歸德崔立以汴京降金主復奔蔡蔡恃柴  
潭爲阻會宋將孟琪決其南潭水涸金人懼啟南門求死戰柔力  
與鬪而急遣人阻其內隍蔡遂破入朝太宗數柔功班諸將上賜

金虎符進軍民萬戶九年詔屯兵曹武柔遂會諸軍取光州又進  
趣黃州越湖接戰壁於黃州西北隅有乘舟出者柔曰此伺我也  
宋人必夜來襲乃分軍爲三以待之夜果至遮擊大敗之宋懼請  
和乃還都元帥察罕攻滁州久不克欲解去柔以二百騎經過宋  
諸戍壘中二十餘戰乃至滁遂請決戰卒拔之十一年以本官節  
制河南諸翼軍馬征行事河南三十餘城皆屬焉明年詔會八萬  
戶伐宋十三年升保州爲順天府賜御衣名馬又賜尙廐馬百柔  
帥師自五河口濟淮略和州諸城察罕奏柔總諸軍鎮杞初河決  
於汴西南入陳留分爲三杞居其中渾宋人恃善使船駐亳泗輒  
犯汴洛柔乃卽故杞之東西中三山夾河順殺水勢築連城結浮  
梁進戰退耕敵遂不至會諸軍攻破壽州柔欲留兵守之察罕不  
可柔又敗宋師於泗州還杞帳下吏夾谷顯祖上變誣柔事卒白

元書 卷四十一 二  
憲宗卽位換金虎符四年移鎮亳州得賜衣及胡根甲別予金銀符頌諸有功將校九年伐宋世祖出大勝關柔出虎頭關敗宋兵於沙窩促會兵攻鄂柔作鵝車洞其城別遣勇士先登會憲宗凶問至世祖北還留柔統蒙古漢軍城白鹿磯世祖卽位召還阿里不哥僭位世祖師北詔柔入衛至臚胸河復止之分其兵三千五百衛京師以子宏慶爲質初汴京破時柔金帛一無所取獨入史館載金寶錄並秘書圖書訪耆德及燕趙故族十餘家衛之北歸至是以寶錄上且請致仕詔封安肅公至元三年命判行工部事城大都四年進蔡國公明年卒贈推忠宣力胡運功臣太師開府儀同三司上柱國諡武康延祐五年加封汝南王易諡忠武元興柔在保州與嚴實在東平史天澤在眞定皆爲時名諸侯保自兵後久荒柔爲之畫邑井定民居置官廨引泉入城疏溝渠以洩卑

溼通商惠工遂至殷富遷廟學於城東南增其舊制及治亳亳環州皆水非舟楫不達柔登城壁爲橋梁屬汴隄以便商旅復立孔子廟設校官弟子員性尤寬厚當濟河伐金告其眾曰吾用兵殺人多矣得無冤乎自今非戰陣誓不殺也郝經常爲柔館客及見世祖論一天下當順時而動世祖愕然曰汝與張拔都議耶斯足以知柔之明大計矣然柔雄猛兵出未嘗居人後亦會有天幸燕京孱赤台者國人貴將也數凌柔柔不肯下乃譖柔於中都行臺遂召而幽之土室孱赤台施帳寢其上環以甲騎明日將殺之一夕孱赤台暴死柔竟免其攻蔡也嘗以二十卒突陣金人涌至柔已被執孟珙救以出時人皆曰天也子十有一人宏畧宏範最知名宏範自有傳

宏畧字仲傑嘗從柔鎮杞徙亳憲宗五年授金符權順天萬戶從

征蜀帝以其幼賜錦衣還鎮柔致仕宏畧遂襲順天管民總管行軍萬戶佩金虎符仍總宣德河南懷孟等路諸軍屯亳者宏畧有謀畧通經史善騎射中統三年宋將夏貴援李璫自蘄乘虛北奪亳滕徐宿邳滄濱諸州新蔡符離蘄利津等縣殺守將宏畧帥戰艦遏之於渦口貴退保蘄宏畧發亳軍攻蘄宋人焚城宵遁盡復貴所奪地李璫既誅當時與通書者皆得罪獨宏畧以勸璫爲忠義免然遂以例解兵職宿衛京師賜質孫服俾從容侍宴至元三年爲築宮城總管父子並營大都八年授同行工部事並領宿衛親軍儀鸞等局十三年以城成賜內帑金釵瑋瑁卮授淮東宣慰使明年宋人立廣王昺於閩廣揚言將北出時東海有粟數萬行省檄宏畧守之並命造船運粟入淮宏畧顧民舟令曰載十擔者予一擔於是一月而畢十六年徙宣慰江西出境平江東饒州之

盜時重其急公頃之以疾歸亳有讒貴臣子江南買田宅樂而忘歸者辭引宏畧或言公但居亳未嘗在江南自明可也宏畧曰明之則言者獲譴矣遂閒居十餘載二十九年見世祖於龍虎臺請曰臣之子玠長矣願備宿衛從之且賜以酒曰卿年未老何謝事爲特命參知河南政事元貞二年卒贈推忠佐理功臣銀青榮祿大夫平章政事上柱國蔡國公諡忠毅初賈輔者邠州人字元德仕金爲本州刺史武仙憚輔膽畧將圖之輔以眾歸太祖詔屬柔遷左副元帥柔將兵在外輔嘗居守累官順天河南等路萬戶當是時柔輔皆鎮順天喜藏書好賓客天下儒士皆樂稱順天二萬戶輔卒子文備襲爲千戶從張柔屯亳數與宋戰有功遷宿州萬戶後從宏範破宋武磯堡渡江復從阿里海牙破潭州守之進湖南宣慰使徇瓊崖等州改宣慰淮東遷參知湖廣政事尋致仕卒

贈江西左丞武威郡公諡莊武

洪福源本中國人也唐時遣其祖往教高麗遂家焉久之子孫繁衍因名所居曰唐城云父曰大宣以都領鎮麟州福源爲神騎都領太祖十二年遼王留哥叛校咸舍據高麗江東城十三年留哥以哈真札刺蒙古軍征之大宣迎降高麗王暉見大軍至亦請內附因遣樞密使趙冲共討滅咸舍十九年高麗殺使者著古與等十二人太宗三年乃命撒禮塔討高麗福源遂率先附州縣之民與撒禮塔併力攻不附者撒禮塔遣阿而禿及福源進至王京暉乃遣其弟懷安公佺請降旣而又叛驅其國人竄入江華島事具高麗傳是時福源在北界因招集四十餘城遺民以待大兵俄撒禮塔復以兵至福源帥所部從攻處仁城撒禮塔舉福源獨留屯領諸降人五年高麗悉眾攻殺降民劫大宣以東福源遂盡以其

遺眾來歸處遼瀋閒帝嘉其忠明年授金符命爲管領歸附高麗軍民長官仍司招討七年帝以唐兀拔都兒及福源復征高麗明年入朝賜以鎧甲弓矢金織文段金鞍勒諸金銀器昭慈皇后稱制之四年從阿母罕用兵憲宗元年易金虎符長官如故三年復從也苦大王往征明年又與札刺兒帶合兵入高麗福源前後凡所攻拔數十城語具各本紀八年福源遣子茶邱從札刺兒帶軍會高麗王族子綽入質陰欲併總本國歸附人民遂譖福源殺之後贈嘉議大夫瀋陽侯諡忠憲子七人茶邱雙叔最知名

茶邱本名俊奇早歲以驍勇受知世祖嘗呼爲茶邱其小字也後遂以小字行中統二年茶邱求雪父冤詔曰汝父方加寵用誤絀刑章故於已廢之中用沛維新之澤可就帶元降虎符仍管領歸附高麗軍民總管至元六年從國王頭輦哥赴高麗討其叛臣林

元書 卷四十一 五  
衍明年復命茶邱帥兵往鳳州立屯田總管府八年同經畧使忻  
都史樞敗衍黨於珍島其酋金通精走耽羅十年遂拔耽羅誅通  
精餘寇悉平十一年授征東右副都元帥與都元帥忻都等領舟  
師二萬渡海掠日本境而還十四年進都元帥從丞相伯顏北征  
敗只里瓦台於禿兀刺河賜白金金鞍勒弓矢十七年進征東右  
丞明年復征日本茶邱同忻都自高麗金州合浦以進是時范文  
虎棄師平壺託言颶風壞舟諸將皆駛還事具文虎傳二十四年  
乃顏大王反車駕親征命帥高麗女真漢軍赴行在茶邱與其子  
重喜自遼東而西重喜本名萬方茶邱爲右丞重喜襲總管佩父  
虎符至是爲前驅而茶邱以三千人繼其後重喜已去茶邱猝與  
乃顏別部萬餘騎遇眾懼茶邱令夜多裂裳帛爲旗幟斷馬尾爲  
旄掩映林木其軍大驚遂降重喜扈駕至撒兒禿魯乃顏前鋒塔

不歹猝至帝疑之以計事在烈祖四王傳其夜重喜同漢軍都元  
帥李庭萬戶昔刺帖木兒襲擊塔不歹大破走之又敗其將黃海  
之軍御史大夫玉昔帖木兒之追獲乃顏重喜實從之尋復從敗  
乃顏餘黨金家奴於札馬刺禿河進渡那兀江至夢哥山並禽金  
家奴塔不歹而還帝嘉茶邱功改遼陽尙書右丞俄而合丹大王  
復反重喜復從諸王愛牙赤乃蠻台討之自遼東而北前軍遇敵  
於木骨不刺稍卻重喜帥騎兵冒鋒陷陣大破之又及伯帖木兒  
敗其眾於烏木站進至黑龍江戰於貼里揭屢破其軍然弗能渡  
江而還二十五年復從玉昔帖木兒出師及合丹戰於鐵里干及  
木骨兒抄刺是時合丹盤桓勢都兒王之境惟欲南出遼陽及玉  
昔帖木兒東與遼陽兵合合丹則退師再西渡那兀江向貴烈河  
重喜師兵先涉敗之其冬從渡黑龍江及古土禿木干戰克之二

元書 卷四十一 六  
十七年茶邱以疾辭位而合丹竄入東甯遼陽騷動帝命起茶邱仍鎮遼左賜金字圓符便宜行事明年重喜從平章政事辭闈干平合丹於青州其歲茶邱卒錄重喜功佩三珠虎符賜玉帶白金進遼陽行省右丞二十九年仍佩元降虎符總管高麗女真漢軍萬戶兼安撫使高麗軍民總管尋復爲遼陽右丞大德十年罷武宗立重喜入朝至大二年謫漳州行至杭遇赦還明年卒子滋襲雙叔亦曰雙壽本名君祥年十四隨兄茶邱見世祖於上都命劉秉忠相之秉忠頗稱異而勸其致力於學至元三年籍高麗民三百爲兵以雙叔領之從諸軍築萬壽山復開通州運河帝親獎其忠勤旣而帝閱江南海東輿圖欲召知者詢以險易丞相伯顏樞密副使合達同舉雙叔旣入對指陳詳明帝悅賜以巨觥酒曰兒遠大器也嗣從征高麗復從伐宋攻淮東西皆有克獲十一年伯

顏大舉伐宋雙叔以蒙古漢軍都鎮撫從右衛軍攻淮安數充使往來江南北軍中又數入朝伯顏入都再赴江上雙叔遂從伯顏南行師次鎮江是時宋有都統洪模方爲督府將伯顏曰汝同姓可往招致也雙叔卽遣人招之至崇德而模以宰相命持書來約與伯顏會模遂請降尋報宋人密事伯顏乃命模護宋三宮以雙叔與俱復令與程鵬飛入宮慰諭謝后宋平授中衛親軍千戶三遷爲同僉樞密院事二十四年乃顏反從世祖親征每駐蹕雙叔輒以兵車外環爲營衛布置嚴備帝甚嘉之二十八年授遼陽右丞未行仍以本官加集賢大學士議者欲自東南海口辛橋開河合灤河運糧至上都詔與中書右丞阿里相其利害還極言不便罷之復奉使高麗進僉書樞密院事成宗卽位詔裁減久任官知樞密院暗伯奏雙叔在院十六年最久矣帝以其始終一心仍留

之大德二年詔使高麗被劾追回已而事罷明年復奉使江浙問民疾苦還退居皇華山閉戶五年七年召拜司農俄遷右丞明年出爲右丞於江浙尋復改涖遼陽代其兄子重喜任武宗卽位徵同知樞密院事復出以平章政事商議遼陽省事尋拜平章遼陽政事至大二年薨雙叔竟通學術從征乃顏凱旋類次車駕起居爲東征錄在遼陽奏宜新省治增巡兵設儒學提舉官都鎮撫等員以興文化修武事以徵還事未就人歸重焉子邁同知開元總管府事

汪世顯字仲明鞏州定西人其先汪古族也後居定西爲邑里豪長金末嘗出糧助軍又募壯士協力城守累禦西夏以功遷領綏德刺史進通遠軍節度使金亾之前歲金主擬遷鞏昌因以粘割完展爲鞏昌行省世顯旣久專鞏昌事惡完展來制已旣又聞金

主已亾於蔡也遂賊殺完展欲附於宋宋四川制置使趙彥呐爲之數四力請於朝其丞相鄭清之終不肯受太宗七年闊端太子伐鞏昌世顯遂降自言在金爲便宜都總帥太子遂承制命仍其職卽從伐蜀是時宋利州提刑高稼守沔州拔其城斬稼進師青野原而趙彥呐據原阻兵圍之宋御前都統制曹友聞來援師還明年復從闊端太子進擣大安攻曹友聞斬之大安拔進軍昭化奪其城於是世顯別將略資州西至嘉定東下開州宋軍屯萬州南岸世顯卽水北造船以疑之而夜從上游鼓革舟襲破之追奔至巫峽遇宋援軍斬首三千級九年還攻重慶會大暑乃罷歸入覲太宗授金符易其名曰中山帝盛獎其功世顯遜謝焉十三年復從闊端太子伐蜀圍成都宋四川制置使陳隆之堅壁不出其部將田顯約夜降而隆之覺之欲發世顯曰事急矣亟梯城援顯



而屠隆之家囚隆之至漢州以誘其守將王夔隆之不從而後殺之夔出奔漢州亦下昭慈皇后稱制之二歲閻端太子第功得總秦鞏二十餘州事賜金虎符尋卒中統三年贈隴西公諡義武後加贈隴西王子七人德臣良臣知名忠臣鞏昌便宜副總帥直臣鞏昌中路都總領翰臣奧魯兵馬都元帥佐臣鞏昌左翼都總領清臣至四川行樞密院副使而直臣佐臣皆歿王事焉

德臣賜名曰田哥字舜輔年十四入宿衛侍游獵矢無虛發世顯卒德臣襲鞏昌便宜都總帥從征蜀將前軍出忠涪所向克獲復北攻運山破其外城而還失烈門二年宋四川制置使余玠攻興元圍龍古帶德臣馳救力戰卻之憲宗卽位德臣入覲賜印符二年復從都元帥帶荅兒征蜀命城沔州沔據嘉陵要路德臣繕治室廬部署官屬數日而集德臣銳意圖蜀以併宋會世祖以皇弟

出征大理至臨洮德臣道謁請城利州世祖命以聞其歲德臣輕兵略成都薄嘉定四川大震還至隆慶擊破宋人昏夜斫營之師明年遂立利州請免州徭賦而漕糧屯田爲久長計並乞以兄忠臣攝府事使己得專治利從之卽命置行部於鞏立漕司於沔通販鬻給餉饋由是利州屹然成巨鎮會四年春旱嘉陵漕舟水澀議者因欲棄去德臣堅持不可乃盡殺所乘馬饗士而襲嘉川得糧二千餘擔復戰敗雲頂山之師得糧五千石旣而魚關金牛水路運偕至屯田麥亦登食用遂給取蜀之嘉定矣無何獲宋二將令說苦竹隘守將南清降悉歸所俘東南戍卒數百有去志德臣亦給券縱之皆泣謝於是山寨相繼輸欵宋四川制置使余晦遣兵數萬城紫金山德臣卽選精卒銜枚夜進大破之南清北覲其下殺清妻子復爲宋守宋將焦遠領兵餉之德臣擊敗遠後軍二

元書 卷四十一 九  
萬復至又敗之俱獲其資糧魚關至沔水迂回爲渡百有八至是  
橋梁悉成後路益闢八年憲宗親伐蜀至利州駐北山謂德臣曰  
敵曾薄汝城否對曰未也帝曰彼憚卿威名耳賜之金帶爲立石  
紀功焉帝以州西嘉陵白水交會曰桔柏津水勢洶急因問德臣  
船幾何幾日可畢渡對曰大軍非可淹延當別爲方略卽繫舟爲  
梁一夕而成如履坦途帝大悅復賜之金仍命刻石苦竹旣逆命  
至是攻之巖壁峭絕或請建天橋帝以問德臣對曰臣知先登陷  
陣而已建橋非所知也橋果無功會史樞偵知其疏失德臣遂用  
其言魚貫而進帝望見歎曰人言田哥膽勇豈虛耶於是苦竹願  
降其拒者盡殺之帝以德臣疾飲以葡萄酒並解玉帶賜之曰汝  
疾皆爲我家飲我酒服我帶疾其有瘳乎俄攻拔長甯帝遂東下  
德臣爲先鋒抵大獲山守將楊大淵抗命未幾而降遣子乞活數

萬人德臣引至帝前請之從之於是龍州守將王德新亦遣所親  
乞降以郡民爲祈亦奏如其請明年帝帥諸王大將圍釣魚山守  
將王堅負險凡五月不能下德臣單騎至城下說堅幾中飛石遂  
感疾帝遣使問勞俾還利州奏曰陛下猶冒寒暑服勞於外臣死  
其分也遂卒年三十六中統三年追封隴西公諡忠烈子六人惟  
賢大司徒惟和昭文館大學士惟明質子元帥惟能征西都元帥  
惟純權便宜都總帥其長曰惟正

惟正字公理幼喜談兵時出游獵則勒從騎爲攻守狀然性穎悟  
亦輒從文士議論古今人多稱之德臣卒憲宗尋亦崩壽王脫里  
出令惟正權襲父職守青居山世祖卽位乃真授焉初憲宗遣渾  
都海以騎兵二萬守六盤又遣乞帶不花守青居已而渾都海附  
阿里不哥乞帶不花欲發兵爲應惟正以川陝宣撫使廉希憲之

屬卽令力士縛乞帶不花斬之世祖嘉其功詔處分東川軍事中  
統二年入朝賜甲冑寶鞍明年詔還鞏昌時阿藍荅兒餘黨火都  
叛據吐蕃點西嶺民大擾惟正與將佐計曰火都今若獠犬方肆  
狂齧苟一戰不利則城邑墟矣不若以不戰勝之策之上也乃發  
兵踵之然欲戰不得休則撓之逾二月知其糧盡曰可矣遂戰屢  
捷火都遣人來約降因陽許之而潛兵躡其後出其不意禽殺之  
至元九年惟正代良臣復鎮青居帥師掠忠涪多所降獲十一年  
惟正聞丞相伯顏自襄陽伐宋惟正奏曰蜀未下者數城耳宜併  
力攻餘杭願以本兵下夔峽與伯顏會錢塘帝優詔荅之而以蜀  
事重止其行明年兩川行院合兵圍重慶命益兵助之惟正奪其  
洪崖門得獲宋將詔召還佐秦王忸哥刺鎮長安十四年秦王北  
征合刺海而南平王禿魯叛於六盤王相府檄別速帶領兵進討

惟正爲副別速帶不習兵惟正爲正部曲肅行陣嚴斥候軍政一  
倚焉進次平涼簡鞏卒銳者八千人與俱至六盤禿魯先據西山  
惟正分安西兵爲左右翼鞏兵獨居中去里許皆下馬手弓禿魯  
令騎突陣惟正令引滿勿發將及又命曰視必中而發於是矢下  
如雨突騎中者三之一餘盡馳還禿魯遂走惟正麾兵逐之三踰  
山至蕭河復進兵禿魯就禽秦王還亟稱其功明日大宴賞以金  
尊貂裘王妃復賜其母珠絡帽衣詔入朝世祖推玉食食之賜白  
金錦衣授開成路宣慰使十七年進川陝左丞賜玉帶以省治去  
蜀遠乃命惟正分省於蜀蜀中荐罹兵革民無完居惟正留意撫  
循人便安之二十二年改陝西左丞入覲上都還卒於華州年四  
十四諡忠肅子二人嗣昌成都管軍副萬戶壽昌南臺中丞  
良臣年十六七卽從兄德臣出征每戰輒先以功擢都府參議憲

元書 卷四十一  
宗三年德臣薦令領兵屯田白水宋邊寨不敢復出鈔掠憲宗伐宋至六盤良臣還鞏昌主供億詔權便宜總帥府事良臣奏願從兄効力定四川帝曰行軍餽餉爲急非汝誰任於是乃受命治橋梁平道路管舟車水陸無壅詔賜黃金弓矢以旌其能世祖卽位渾都海劉合刺不花附阿里不哥劫六盤府庫川陝宣撫使八春與戰而敗賊遂破西涼盡掠只必帖木兒大王輜重良臣自鞏昌發兵追之會阿藍荅兒南來至甘州與渾都海合軍復東遇於耀碑谷時合丹合必赤大王將精騎出自居延八春之師亦至於是合丹陣於北八春陣於南良臣陣於中旣交鋒大風揚沙晝日晦曠眾軍四合賊遂大潰獲阿藍荅兒渾都海殺之西土以平賜良臣金虎符中統二年復討平火都之叛入覲授同僉鞏昌路便宜都總帥賜金鞍甲冑弓矢命鎮青居伏甲於舟敗宋嘉定安撫使

管萬壽之師明年遷閬蓬廣安順慶等路征南都元帥良臣以釣魚山險絕不可攻奏請就近地母德章山築城曰武勝以扼其往來四年帥師攻重慶戰敗宋兵至元六年遷東川副統軍八年兄子惟正言良臣久勞戎行乞身代之明年遂授良臣鞏昌便宜都總帥兼本路諸軍奧魯總管十年帝以成都被兵久復命良臣入蜀拜西川行院樞密副使良臣悉蜀形勝旣柄兵事以平定爲志十一年遂進攻嘉定管萬壽堅守不出良臣知有伏兵搜谷殪之萬壽悉兵出戰復大敗之明年萬壽遂降於是紫雲瀘敘相繼欵附俄詔會東川行院兵圍重慶十三年宋涪州安撫使楊立救重慶良臣再擊走之立尋以城降是時宋四川制置副使張珩不能赴重慶猶在釣魚山乘閒遣將復陷瀘涪而東西川號令不一圍遂潰張珩遂入重慶守之良臣收軍圍瀘州明年克之復攻重慶

十五年珏遣眾出戰良臣奮擊大敗其軍然身已中四矢明日督戰益急重慶降獨珏出走獲之因禁俘掠發粟振饑民大悅四川悉平入覲遷四川左丞賜白貂裘良臣奏治蜀十五事以撫循爲急帝並嘉納行省罷改安西王相不赴十八年以疾卒贈儀同三司諡忠惠加贈推誠保德宣力功臣陝西平章政事梁國公子七惟勤至雲南平章政事

楊大淵天水軍人也憲宗八年親伐蜀是時宋閬州徙治大獲山以大淵爲安撫使守之憲宗使宋降人招大淵大淵殺之帝怒命諸軍力攻之大淵懼乃降旣而復逃歸帝復欲屠其城賴李忽蘭吉追及之與偕來而免語具忽蘭吉傳帝旣宥大淵欲以勸來者卽以爲侍郎都行省而命以其兵從大淵招降蓬州明年從攻釣魚山復從蒙哥都大王攻禮義城未克世祖卽位賜之詔曰尙厲

忠貞之節共成康乂之功大淵拜命踴躍卽進攻禮義城掠其饋運獲其總管黃文才等中統二年帥師出達州與宋將鮮恭戰復獲其統制向繼恩川陝行省以大淵及征南都元帥欽察部將六十三人有功錄聞於朝詔給虎符一金符五銀符五十七令論功定官以名聞三年復與宋人戰於平田又戰於巴渠禽其知軍范燮等四人先是大淵建言取吳必先取蜀取蜀必先據夔乃遣兄子文安攻宋巴渠萬安寨守將盧埴降復使文安相夔達要衝城蟠龍山城未畢宋夔路提刑鄭子發曰蟠龍夔之咽喉使敵得據之則夔難守矣此必爭之地也遂帥師來攻文安悉力備禦大淵復遣文安兄文仲援之宋師宵遁追敗之詔賜大淵麾下將士金符十銀符十九別給海青符二以馳奏急事大淵欲於利州大安軍以鹽易糧奏請從之尋入覲拜東川都元帥得與欽察同署事

還復濱渠江築虎嘯城以逼大良不踰時而就四年宋賈似道遣使以空名告身及蠟書金幣誘大淵南歸事聞詔誅其使帝以大淵及張大悅復神山功降詔獎諭仍賜其軍士鈔至元元年大淵進花羅紅邊絹各百五十段詔曰所貢已見忠勤卿守邊陲宜加優恤自後俟旨乃進既而大淵擅殺其部將王仲詔戒敕之令免籍仲家宋都統祁昌輸糧得漢城並欲遷郡守向良於內地大淵襲之於椒平大戰三日禽祁昌俘獲輜重甚眾復大破宋將張思廣之軍明年大淵以獲得向良家人往招良未下會以疾卒八年贈閬中郡公諡肅翼子文粲襲東川都元帥

文安字泰叔父大全仕宋守敘州與國兵戰死宋贈武節大夫眉州防禦使官其長子文仲文安時甚幼依叔父大淵於閬中大淵之降文仲亦授安撫使世祖詔厲大淵其歲又授文安監軍遂攻禮義城及開達州功多授開達忠萬梁山等處招討使軍於巴渠以降萬安寨築蟠龍城功得佩銀符授千戶監軍如故既築虎嘯城復敗宋都統張喜攻蟠龍兵又築方斗城爲蟠龍聲援宋兵攻潼川文安敗之於納壩復從大淵邀擊祁昌獲之大淵卒向良以得漢城降文安改佩金符累功充夔東路征行元帥入見詔賜黃金鞍馬至元三年總帥汪惟正遣將襲開州文安亦遣將助之開州破遂成焉而宋兵來甚眾圍三市明年文安往援宋兵戰甚力文安面中矢拔以戰大破之尋以創甚還蟠龍開州遂復入宋五年文仲卒詔文安就佩金虎符充閬州夔東路安撫使軍民元帥仍副都元帥府事閬州累遭兵燹戶口凋耗文安乃教以耕桑蠲寡願相偶者併戶充役民始復業七年從四川僉省嚴忠範攻重慶大戰於龍坎敗宋兵時宋以朱禕孫帥蜀閬人也數遣謀至閬

動搖人心文安屢獲之祺孫計遂不行復入見遷東川路征南招討使賜金銀寶鈔鞍馬弓矢幣帛有差文安與宋人力爭開達用兵十年大小殆百戰破其城寨數十斬俘其將數十人獲貲無算十一年宋以鮮汝忠趙章易鎮開達而汝忠家屬尙留開文安計曰達未易攻若先拔開州俘其家屬以招汝忠則達可不煩兵而下矣卒如其策破開州禽趙章而汝忠以家屬俘入蟠龍果聽招以達州降進收龍爪由山諸城遣使以鮮汝忠等入朝加文安兼宣撫使於是引軍東下攻梁山萬州皆不克進攻夔守將張起巖堅守不出文安以師老乃還而宋都統弋德復據開州文安乃築城神仙山以逼之十三年賜玉帶宋梁山降復攻萬州夔守張起巖來援敗之萬州守將上官夔戰死遂有萬州進奪施州明年破威純禽宋六郡鎮撫馬堃十五年復克紹慶禽其守將解龍是時

重慶已爲汪良臣所破蜀土略定惟夔久不下旣而張起巖亦降文安入覲以所得城邑繪圖以獻帝勞之曰汝攻城略地之功何若是多也擢四川南道宣慰使解白貂裘賜之十七年文安諭降散毛諸洞蠻以其子入見加遙授參知政事十九年擢江西左丞到官踰月以疾卒子良之襲爲管軍萬戶佩虎符歷湖南宣慰副使岳州路總管

論曰柔世顯在金福源在高麗大淵在宋皆能攻戰之臣也天亾其國遽改所事福源竟以冤死然則人亦何貴屈膝向人哉然而其子孫皆能以才自達興也勃焉獨世顯始負金殺其行省嗣欲降宋而宋不受皆炳在兩史易曰來兇凶世顯雖遭時竊位然凶之道也而欲以好爵是靡賢其子之和而並美及鳴鶴過矣

曾毓辛

門人羅蔭棠 刊

門人曾哲

門人曾廣紳襄校

門人曾士琮詳校

元書卷四十

元書卷四十一

邵陽曾廉讓

王義二張王珍杜豐田雄列傳第十六

王義字宜之真定甯晉人也有膽智金末河北多盜眾推義為長  
 以保鄉里遂攝行縣事木華黎南伐義以眾降詔真授為令兼趙  
 州以南招撫事是時民久廢農耕所在人相食甯晉東有古大陸  
 澤周回百餘里中有小堡曰瀝城義曰瀝城雖小而完且有魚藕  
 菱芡之利不可失也乃留偏將守甯晉而身帥眾保瀝城由是全  
 活者眾金將李伯祥據趙州木華黎遣義擣之會天大風雨義夜  
 潛入其城伯祥遁走木華黎署義知趙州趙冀二州招撫使金監  
 軍納蘭冀州節度使柴茂將兵萬餘北行義伏兵敗之於故堂陽  
 還拔東鹿遂攻深州降之張柔上其功進深州節度使深冀趙三



州招撫使金真定帥武仙以兵四萬來攻東鹿以爲東鹿兵少糧乏城無樓櫓可一日拔也義隨機應拒積月不能下一日義鼓勵將佐椎牛饗士遂以精銳三千銜枚夜出直擣仙營殺數千人仙遁悉獲其資仗踰年復拔冀州禽柴茂遷龍虎衛上將軍武安軍節度使行深冀二州元帥府事佩金虎符仙復使盧秀李伯祥帥兵謀襲趙州並取瀝城以戰艦數百沿滹沱而下義具舟紀家莊邀擊之義所部皆故生澤上善水戰回旋開闔往來如風雨遂禽秀伯祥西走二子死焉邢州任縣有水寨久爲盜據史天澤集兵攻之不能克義一鼓下之斬其渠魁餘黨悉平義乃布教令招集散亡勸率種藝深冀之間遂爲樂土焉

張榮字世輝濟南歷城人也狀貌奇偉嘗從軍爲流矢貫背拔之不出令人以足抵其額而拔之神色自若金季山東多盜榮帥鄉民據濟南巒堂嶺眾稍盛遂略章邱鄒平濟陽長山新市蒲臺新城及淄州之地而有之兵至則清野入山太祖二十年東平保州皆內屬榮遂舉其地納款於按陳那顏引見太祖問以孤軍數載獨抗王師之故對曰山東地廣人稠皆爲帝有臣若但有倚恃亦不款服太祖壯之拊其背曰賽因拔都兒也授金紫光祿大夫山東行尙書省兼兵馬都元帥知濟南府事時貿易用銀民爭發墓劫取榮下令禁絕太宗二年朝廷集諸侯議取汴榮請先六軍以清蹕道帝嘉之賜衣三襲詔位諸侯上明年軍至河榮帥死士宵濟奪船以濟後軍進破張盤二山寨俘獲萬餘總帥阿朮魯欲盡殺之榮力爭而止五年汴梁下從阿朮魯爲先鋒攻歸德議欲烹俘取油以灌城又力止之旣而城下榮單騎先入撫其民明年攻沛守將唆蛾夜來擣營榮擊殺之城破遂克徐州叛將國安用赴

水死七年拔邳州八年從曲出太子破宋棗陽等三縣時河南民北徙至濟南榮下令民間分屋與地居之俾得樹畜且課其殿最曠野闢爲樂土是歲中書攷績爲天下第一授濟南路萬戶世祖卽位封濟南公致仕時與張柔同日封公益寵禮之異他諸侯焉未幾卒年八十三子七人邦傑當襲爵先卒邦直行軍萬戶邦彥權濟南行省邦允知淄州邦孚大都督府郎中邦昌奧魯總管邦憲淮安路總管孫四十人宏從世祖伐宋渡江傅鄂州世祖卽位命襲爵宏因間密陳李壇逆跡甚悉未幾而李壇果反宏及其祖榮告變京師遂命宏爲諸道兵前導李壇平例改眞定路總管以事免後以克襄樊功授襄陽等處統軍使致仕歸濟南卒

劉斌榮同縣人也從榮起兵爲管軍千戶太宗四年從攻河南以功授中翼都統攻歸德軍杏堆距陳州七十里聞陳整軍於近郊

斌帥眾夜破之又擊走太康守兵禽其將三日太康克榮言於阿朮魯曰太康之平摧其鋒者斌也移屯襄陽軍乏食斌計青陵有積穀可取眾以其前阻大澤深不可測爲辭斌曰惟彼恃險不我虞取可必也乃帥百人夜發獲敵人使導之前行汙澤中五十餘里遇敵兵斌舍馬揮槊突敵敗之得其糧數千斛遷官知中外諸軍事從攻六安先登破其城累官濟南新舊軍萬戶移鎮邳州宋將憚之憲宗九年卒病革戒其子曰居官當廉正毋黷貨以喪身敗家贈參知政事護軍彭城郡公諡武莊子思敬賜名哈八兒都襲職爲征行千戶世祖南征從董文炳攻臺山寨先登中流矢傷甚帝親勞賜酒易金符累遷西川副統軍換虎符宋嘉定守管萬壽乘虛攻成都哈八兒都邀擊敗之於青城奪所俘二千人還數歲遷同僉行樞密院事復從汪良臣攻取嘉定瀘敘忠涪諸郡及

元書 卷四十一  
籌勝龜雲石筍等寨十九族西南夷五十六部悉來降旣而瀘州復叛哈八兒都妻孥沒焉旋討克之蜀平拜四川參知政事徙江西卒官贈推忠宣力果毅功臣平章政事柱國濱國公諡忠肅弟思恭右衛親軍都指揮使思義昌國州達魯花赤

張子良字漢臣涿州范陽人也金末所在多募兵備盜子良少有膽智以材選爲千戶以功遷都統卽帥千餘人入燕薊閒具舟筏阻流水取蒲魚自給時池已荒穢以可得食從之者益眾至不能容子良部勒定興新城數萬口就食東平東平行省蒙古綱納之久之蒙古綱棄東平守邳檄子良南屯宿州又南屯壽州夏全劫其民出雞口李敏據州子良帥麾下造敏欲害之走歸宿遂以宿帥紇石烈阿虎之眾奪全所劫老幼以還全怒連軍來攻子良與宿兵斫其營全失其軍符走死揚州已而徐宿邳皆亂附國安用

而金南京已被重圍安用已無所歸思屬金乃與三州帥刑馬績盟時子良爲宿帥眾僧奴幕府眾僧奴遣子良潛由閒道賫奏牘入汴稱眾僧奴結安用入援且將進米朝議多子良占對詳盡又以慷慨赴京闕因授總管陝西東路軍馬然安用實無入援意子良意歉然失國望欲至陝則地已入元乃仍屯宿州凡徐宿閒民出城拾糶穉者子良則嚴兵護之以防鈔掠一日猝遇敵子良負重傷遂帥其眾就食泗州泗州閱兵又欲圖子良乃與麾下十數人卽軍中縛其守民不欲北歸者走旁郡子良資以舟楫無敢掠其財物太宗十年子良乃帥泗州西城二十五縣軍民十萬八千餘口因總帥阿朮魯以降命爲京東路都總帥遷京東路行尙書省兼都總帥管領元附軍民自兵興子良轉徙南北依以全活者不可勝計憲宗立命爲歸德府總管世祖以爲歸德泗州總管降

虎符十餘歲命以元降戶隸郡縣改授大名路總管兼府尹卒年七十八贈僉樞密院事上輕車都尉清河郡侯諡翼敏子懋懋字之美總帥阿朮魯復立歸德府懋分領其父眾以從遂以懋軍鎮歸德移鎮邳州累擢濟南新軍千戶從征南都元帥阿朮破襄樊丞相伯顏伐宋懋以鷲勇將鐸車弩前行凡所過山川道路險隘通梁筏平塹弃安營設伏出納奇計伯顏信用之擢爲省都鎮撫臨安下師還駐瓜洲伯顏令懋往諭淮西夏貴貴出迎設賓禮懋示以順逆禍福辭旨雄厲貴頓首上地圖降還報伯顏大喜復令諭淮西列城軍民宣布德意詔授泗州安撫司達魯花赤改同知淮西宣慰司事復改吉州路總管懋惡衣糲食慎刑平政新府治設義倉部使者劉宣重之凡有懲治朝至夕報豪強悚然郡萬戶蘇良恃勢暴民復有翼之者號十虎乃劾諸憲府誅十虎而

黜良又帥騎擣盜穴縛其酋流亡及遠來者數千家爲立生祠焉卒官贈昭勇大將軍龍興路總管上輕車都尉清河郡侯諡宣敏孫珪尹高安有善政擢南臺御史終江西廉訪僉事

王珍字國寶大名南樂人也金末多盜珍從其縣人楊鐵槍者聚眾保鄉里國兵徇河北鐵槍以眾降行營帥按札兒署珍軍前都彈壓鐵槍戰死眾推蘇椿領其兵宋將彭義斌侵大名椿戰敗以城降珍棄其家閒道走還按札兒嘉其誠款以爲假子復從速魯忽擊走義斌蘇椿復降珍妻子亦無恙論功授大名路治中軍前行元帥府事俄以取甯海朥城遷開曹滑濬等處行元帥府事兼大名路安撫使蘇椿不自安復欲叛歸金珍因先與元帥梁仲發兵攻椿椿遁國王幹嗔授珍行省驃騎上將軍同知大名府兼兵馬都元帥復從速不台經略河南敗武仙於京水梁仲死珍並將

其軍國安用據徐邳珍從大赤及阿朮魯攻拔之授同僉大名行省事從破宋光州棗陽廬壽滁州皆有功宋城五河口珍帥死士二十人奪之宋人遁乘勝連破濠泗渦口太宗授珍總帥本路軍馬管民次官佩金符珍言於帝曰大名困於賦調貸西域賈人銀八十錠及逋糧五萬斛若復徵之民無生者矣詔官償所借銀復盡蠲其逋賦已而朝議分蒙古漢軍戍河南珍戍睢州修城隍明斥候宋兵不敢犯定宗立入朝進本路征行萬戶換金虎符在鎮九年卒子文幹襲爲行軍萬戶從世祖攻鄂戰甚力復從哈必赤大王討平李壇論功語以官賞對曰增秩則榮止一身賜金則恩逮麾下乃以白金二千兩器皿百事雜綵數百段賞之文幹悉頒之軍中尋制父兄子弟並仕同塗者罷其子弟文幹以其弟文禮爲千戶因乞罷而留文禮詔改同知大名路總管府事追論鄂州

功進僉東川行樞密院事歷全州衛輝東平總管遷江東建康道提刑按察使卒官發篋惟錢七緡至不能歸葬焉

杜豐字唐臣汾州西河人也仕金爲平遙義軍謀克國兵取太原豐帥所部降按陳那顏授以兵馬都提控從攝國王按札兒攻平陽先登進克絳州解州諸堡招集流民三萬餘家賜金虎符遷征行元帥左監軍金人南遁遂以豐守河北太祖十五年金上黨公張開以萬眾寇汾州豐帥精騎五千敗之復從按察兒下懷孟破溫谷木澗等寨攻洪洞西山斬首六百級攻松平山破之十七年授龍虎衛上將軍河東南北路兵馬都元帥便宜行事遂破玉女割渠等寨俘獲千餘人太宗元年以本部取沁州由是銅鞮武鄉襄垣綿山沁源皆下命豐撫定平陽太原真定及遼沁未降山寨皆平之七年遷沁州長官長官國初高爵也在官十餘年寬裕薄

賦勸課農桑民以富足定宗二年請老憲宗六年卒子思敬事世祖潛邸累遷治書侍御史阿合馬敗臺臣以不言皆罷思敬獨見留尋出爲安西路總管徙汴梁復召爲侍御史大德中拜參知政事遷左丞致仕卒年八十六諡文定

田雄字毅英北京人也幼孤金末以驍勇署軍都統國兵至北京雄帥眾出降太祖以雄屬木華黎從征興中廣甯諸郡平張鯨兄弟之亂從攻柏鄉邢相復從攻綏葭鄜坊皆有功木華黎承制授雄隰吉州刺史兼鎮戎軍節度使行都元帥府事平汾西霍山諸柵太宗時嘗從攻西和興元又攻夔萬諸州授行軍千戶召爲御前先鋒招納河南降附得戶十三萬七千有奇而別部將校縱兵暴掠民惶懼悔降雄力爲救護至出已財與之民始免難授鎮撫陝西總管京兆等路事時關中苦於兵革郡縣蕭然雄披荆棘立

官府開陳禍福招徠四山堡砦凡獲其人皆慰遣之由是降附日眾雄乃教民力田京兆大治定宗時入覲於和林以疾卒後追封西秦王子大明襲知京兆等路都總管府事其時石抹孛迭兒以戰功擢霸州元帥守固安水寨亦披荆棘立廬舍興屯田爲時稱焉

論曰金元之際天地其遂荒乎詩云民靡有黎具禍以燼王義諸人皆力護殘民以就興主戰功旣著而循良之績懋焉亦生民之幸也

元書卷四十一

門人曾廣謨  
門人曾廣沂  
門人曾英襄校  
門人曾士琮詳校

元書卷四十二

邵陽曾廉撰

三宗諸王列傳第十七

太宗子七人昭慈皇后生定宗皇帝闊端太子曲出太子哈刺察兒王昂灰皇后生合失大王諸后生合丹大王業里訖納妃子生滅里大王

闊端太子太宗時鎮西涼用高耀智言儒者皆給復為時所稱七年命征秦鞏攻石門金鞏昌便宜都總帥汪世顯降遂進伐宋破沔州圍青野原不克明年破陽平關斬曹友聞遂入成都以曲出之喪帥師還其歲命分食東京四萬八千戶十三年復督諸將汪世顯土僻按竺邇入成都斬宋制置使陳隆之於漢州闊端專鎮西土十年承制行事有方面功定宗時薨子五人曰滅里吉歹王

元書 卷四十二  
曰蒙都哥大王曰只必帖木兒王曰帖必烈大王曰曲烈魯大王  
滅里吉歹王早薨子也速不花大王以至元元年賜金印駝紐二  
十五年也速不花以失烈門叛爲甘肅行省兵所討乃自縛請罪  
天子赦之其後無聞

蒙都哥大王亦曰滿都哥憲宗二年命從太宗皇后居於西涼之  
西蒙都哥嘗從憲宗征蜀又征雲南有功績薨子亦憐眞大王嘗  
與出伯擊走章吉元貞二年命駐夏怯綠連河明年來朝道薨天  
子厚賻焉

只必帖木兒王亦曰制必帖木兒亦曰執筆帖木兒嗣父鎮西涼  
中統初渾都海破其帳盡虜只必帖木兒輜重只必帖木兒就食  
秦雍俄還鎮至元九年築新城成賜名曰永昌故又稱爲永昌王  
云十八年復益以江南常德四萬八千戶給闔端後只必帖木兒

亦專制西方得承制行事置行省斷事官亦力撒合使還奏言只  
必帖木兒王設官太濫時稱其直然恭謹有器局董文用爲中興  
郎中數數其下過失只必帖木兒召文用爲之謝又嘗立功西蕃  
薨無嗣弟曲烈魯大王子別帖木兒亦曰伯帖木兒延祐二年命  
襲只必帖木兒位賜以永昌及西涼州田租四年封汾陽王賜金  
印駝紐明年置王傅四人薨子荆王也速也不干

荆王也速也不干史失其封年泰定四年岐王鎮南訴荆王也速  
也不干侵其分地命甘肅行省閱籍歸之文宗之自立也關陝以  
西起兵勤王推也速也不干主軍事是時分兵三道進陝西行省  
平章政事鐵木哥南行臺御史大夫也先帖木兒北靖安王闕不  
花出其中並連克連城大隘語在天順帝紀也速也不干與闕不  
花合軍而東已克虎牢也速也不干駐白馬寺河南旦夕下而上



元書 卷四十二  
都不守文宗遣都護月魯帖木兒至虎牢傳旨放軍闕不花殺其從者而械月魯帖木兒送諸也速也不干也速也不干於是悵然知天子升遐也念無所爲效忠乃遂傳檄各罷兵西還文宗雖惡之亦嘉王進退有禮聽仍守其故封至順元年雲南諸王禿堅不服新命詔召也速也不干子脫脫木兒赴闕而命也速也不干以鞏昌等軍同鎮西武靖王搠思班等征雲南明年雲南平搠思班請暫留也速也不干及岐王鎖南鎮之尋還永昌其歲兩貢犛牛元統時薨後至元元年脫脫木兒襲封荆王命掌莽來諸軍數年薨無嗣封絕至正三年以其地置永昌宣慰使都元帥府十四年復以魏王阿木哥子荅里麻失里爲荆王代鎮西涼事具世祖九王傳闕不花泰定時封靖安王鎮陝西文宗以其效忠天順收其印仍遣還鎮薨年闕至正十六年以闕不花從子蠻蠻襲封靖安

王史未詳其所出

曲出太子一曰闕出亦曰斡赤太宗七年命伐宋破棗陽明年克德安府薨子失烈門太子以太宗遺詔立爲皇帝在位二年附定宗紀憲宗廢之安置於沒脫赤七年分汴梁在城戶爲曲出子孫食邑至元二年改撥睢州五千二百戶以給失烈門子孛羅赤失烈門本不平憲宗所爲旣廢居西荒久未能自便諸王多憐之二十五年太宗諸孫也速不花大王遂以失烈門叛甘肅軍邀而獲之歸於京師孛羅赤子二人曰靖遠王哈歹曰襄甯王阿魯灰哈歹亦曰合帶亦曰哈達亦曰合的二十七年封賜塗金龜紐印阿魯灰亦曰阿魯渾亦嘗附於海都大德十年來降封焉尋薨哈歹子曰也速不干以至大二年襲襄甯王始賜絁紐金印

哈刺察兒王早薨子曰脫脫大王與昔里吉同稱兵者也脫脫與

大名王同居葉密里有河西流入於泊東與滅里鄰北接哈刺魯焉昔里吉隆脫脫不入朝成宗時爲阿速千戶失刺拔都兒禽以歸子二人不王

合失大王早薨子曰海都大王憲宗廢失烈門而自立分置太宗子孫於西邊海都分地曰海押立其南則別失八里合丹地也其北也兒的石河爲滅里地葉密立爲脫脫地其西曲兒只爲別兒哥地別兒哥不知何所出也海押立有泊多水草可游牧漁獵而海都心以太宗子孫失位不得君天下居常怏怏憲宗六年遣斷事官石天麟使於海都海都留之七年仍分汴梁在城戶爲其食邑海都未嘗受及憲宗崩而合丹推戴世祖正位海都亦不善也會阿里不哥與世祖爭立諸王皆觀望互有攜貳海都思乘其闕以收利已而阿里不哥敗不振海都遂決意稱兵然世祖念親親

厚其歲賜至元二年又改食以蔡州三千八百戶遣鐵連通好焉海都終不顧三年遂攻畏吾兒虜其民五年又舉兵南行世祖乃親擊之於北庭敗之海都則遁去絕亦列河至阿力麻里世祖又追之則又絕也兒的石河北遁自是海都乃遷於金山之陰爲牙帳金山者國語曰按台山者也海都雄果有略善用兵故兵繁而銳世祖患之十二年旣南伐宋乃詔北平王那木罕右丞相安童鎮阿力麻里備邊亦會河平王昔里吉煽西道諸王以叛世祖而欽察王拔都怵哥帖木兒已薨再嗣王篤哇及于闐王阿魯忽皆應海都於是太祖太宗定宗憲宗諸王皆海都黨西自蒲昌海北自也兒的石龍骨河又西舍波斯阿八合之國皆非朝廷有也篤哇尤驍桀每與海都相犄角故勢益張然海都明事勢世祖遣昔班復使海都海都旣久弄兵不能得尺寸地又知世祖已定天下

亦卽欲罷兵乘驛入朝以安童襲破大名王禾忽部曲忿而止昔里吉執北平王及安童以通於海都則海都弗納也其後昔里吉被執阿魯忽亦來歸海都獨深念以屈伏爲恥則益思逞兵以爲壯遂與篤哇屢連兵南犯攻殺駙馬高昌亦都護火赤哈兒於哈密力復西擾別失八里威遠王阿只吉不能禦於是乃命同知樞密院事伯顏帥師以備西邊海都與伯顏戰於洪水山而敗然猶禽都元帥綦公直以歸其後帝增命皇孫甘麻刺及成宗及丞相朵兒朶海嚴備北邊而乃顏大王復以東方諸王叛海都則常遣人擾邊而自將大軍踰金山以犯和林和林宣慰使怯伯等皆反應之復敗皇孫甘麻刺於沆海嶺帝已發六師親征聞甘麻刺敗海都已去而還明年海都兵復至阿力麻里朵兒朶海之師不戰潰玉木忽兒明里帖木兒遂虜牙忽都王妻孛輜重以去帝乃復

命伯顏視師和林伯顏連敗明里帖木兒之兵而知海都雄勇難角力必以計取之海都至則陽退欲深入而覆之俄而以御史大夫玉昔帖木兒代伯顏帥而諸將亦謂伯顏怯必急戰遂失海都然自是海都亦知戒不銳進兵亦日怠明年成宗立諸叛王多反正欽察都指揮使牀兀兒大破海都兵於塔魯忽河帝命海山太子總兵北邊以備海都太子與海都戰於闊別列明年又戰於迭怯里古又戰於合刺合塔皆太子親身陷陣牀兀兒及蒙古都萬戶囊家台前衛親軍都指揮使玉哇失喋血出入爭勝負海都卒不得志鬱鬱去遂死子曰察八兒領其眾於是太師月赤察兒知海都之死也急乘其喪掩取其部十萬餘口先是篤哇惟恃海都爲大援故敢自雄及察八兒嗣海都篤哇知察八兒非健者也乃首請歸朝並愆察八兒同遣使焉已而太子立爲武宗篤哇封王

元書 卷四十一 五  
物故月赤察兒建議處降人於金山之陽而以己軍屯田山北厚撫篤哇子寬徹以離察八兒語在博爾忽傳於是察八兒乃來朝諸王畢會是時骨肉構兵四五十年矣漠北空地數千里居民七十萬寓居雲朔間北方平天子喜爲之告祀太廟而大宴諸王於殿酒酣爲陳宗藩始終離合之由去逆效順之義於是諸王莫不傾服知樞密院事康里脫脫用同官只兒合忽之辭也初自太宗時諸王中原食邑各有五戶絲傳之子孫及世祖之世皆如其制已而諸王叛世祖詔尙書曰以絲爲幣彼來畢賜之可也至是察八兒及諸王各賜幣皆感愧焉察八兒後以延祐元年封汝甯王賜螭紐金印命仍父故地二年置王傅官察八兒薨子完者帖木兒嗣完者帖木兒薨子忽刺台嗣忽刺台效忠於天順帝之世懷王據大都忽刺台則帥師破紫荆關進逼大都兵敗死之封絕

合丹大王亦曰哈丹亦稱合丹合必赤亦單稱合必赤或分以爲二人者非也合丹以太宗十三年同拔都旭烈兀昔班諸王及速不台那顏五道出師以擊馬札兒破之分地初近亦集乃憲宗立疏太宗子孫乃徙合丹使居別失八里旣而窺合丹無他復命東還居居延澤上以汴梁在城戶食之合丹勇敢有智略明事機憲宗崩合丹知世祖爲中原所歸心則與阿只吉率西道諸王同來勸進世祖卽位建元中統合丹有擁戴功其歲阿里不哥黨渾都海爲亂已敗川陝宣撫使八春之兵西破西涼權鞏昌總帥汪良臣出軍追之渾都海與阿藍荅兒合復東合丹則帥師出其背會八春及良臣之兵分三道擊之於甘州東平之明年復從世祖擊阿里不哥於昔木土腦兒合丹前斬其大將復與國王塔察兒分兵奮擊阿里不哥遂大敗論功最世祖甚親重之三年賜以行軍

銀印及金銀海青符李壇反詔總督諸軍討之數月壇禽伏誅至元二年改賜鄭州爲之食邑合丹自少常在軍旅世祖初歲親王惟合丹數總軍威望亦獨著然不能改國人舊習多事殺戮人以此短焉數歲薨十八年復益以江南常甯二千五百戶以給合丹子孫子五人曰覲爾赤大王曰也不干大王曰也迭兒大王曰也孫脫大王曰火你大王覲爾赤子曰小薛大王大德二年以其部民貧散處更賜以潞州田二千八百頃小薛子曰星吉班大王也不干大王子曰隴王火郎撒亦曰和郎撒至大元年封王隴賜金印獸紐

火你大王亦曰火你赤子二人曰咬佳大王曰那海大王那海亦稱那海罕天順元年文宗自立齊王月魯帖木兒陷上都那海與同上皇帝寶於文宗焉

滅里大王憲宗使居也兒的石河河在金山西長數千里入於北海河所經中蓄爲大泊足物產和林通西域之所道也滅里同昔里吉引兵攻阿力麻里旋死子曰脫忽大王亦黨昔里吉至元十七年別里帖木兒王師次金山脫忽使人甘言誘王求一見官屬知其詐曰脫忽所居要害殆爲昔里吉耳目也別里帖木兒則繫其使而遣人覘之果然遂襲之脫忽方飲酣兵暴至大破之又乘勢進襲昔里吉亦破之脫忽遂不振子曰俺都刺亦曰暗都刺火者子二人曰愛牙赤大王曰陽翟王禿滿禿滿初附海都大德十年降至大元年以上太宗玉璽封賜金印螭紐仍鎮也兒的石河薨子二人曰太平曰曲春初憲宗食滅里及合丹合失曲出四親王以汴梁在城戶至元二年世祖皆改撥焉滅里之後得鈞州千五百戶至治元年太平行其食邑方在汴詔召入都泰定元年襲

封陽翟致和元年天順帝立大都將燕鐵木兒犯順太平與戰於檀子山死之後以其弟曲春襲曲春薨子帖木兒赤襲帖木兒赤以至順三年來朝或曰曲春傳太平太平傳帖木兒赤也其後有陽翟王阿魯輝帖木兒至正二十年舉兵反詆帝曰祖宗天下何壞失至是寶璽當付我帝降詔諭之不聽乃遣知樞密院事禿堅帖木兒擊之於稱海敗績明年知樞密院事老章討誅之其弟忽都帖木兒從征乃復以忽都帖木兒襲陽翟王二王史失其世論曰憲宗置太宗子孫於西按台也兒的石間山河重互憑爲窟宅莫敢櫻也是資之以險也然勇怯人殊攻守勢異入敵境者強待敵入者弱王師踰金山采入其阻而海都衰矣合丹材武知天命有在不可以力爭己無作覩之望進退皆不免於隨而殘民以逞不亦愚乎易曰係丈夫失小子合丹其有焉

定宗子三人曰忽察大王曰腦忽太子曰禾忽大王皆失其母氏號忽察大王子二人曰亦兒監藏王曰完者也不干王及腦忽太子史並佚其事

禾忽大王亦曰火忽曰霍忽曰和忽分地曰葉密里或曰業瞞有大泊多魚北去也兒的石河二三百里東西通阿力麻里定宗潛邸湯沐邑也初定宗在太宗時賜食大名六萬八千戶而禾忽嗣食大名故又號大名王焉中統初阿里不哥黨哈刺不花與阿藍荅兒渾都海在甘州以論用兵語不合忿而西去及二人被誅其餘眾悉走歸哈刺不花由是縱橫天山南北閒禾忽部落亦大爲所擾甚恨之三年因整兵會于闐王阿魯忽共擊斬哈刺不花於不刺城盡殲其眾而函其首以獻於朝天子嘉焉其後以昔里吉之惑十三年舉兵反犯沙州而東都元帥李庭敗之於河西引還

十四年右丞相安童發兵攻之而虜其輜重於是諸王皆藉口爲大名王報復遂執北平王那木罕及安童語在昔里吉傳禾忽子曰禿魯亦曰禿刺曰都魯曰土魯曰兀魯至元九年己封南平王賜龜紐銀印及金銀符命帥所部從西平王奧魯赤征建昌十二年賞所部獲功建昌者銀鈔有差十三年更賜塗金駝紐印明年安西王忒哥刺北征合刺海禿魯以安童之攻禾忽因內慍遂乘間舉兵叛於六盤爲鞏昌都總帥汪惟正所敗禽焉事在汪世顯傳

論曰定宗孱可念又太宗之正嫡也安童一舉手諸王皆援禾忽爲口實雖其自爲也多亦未嘗無說焉故明於動靜取舍先後之機難矣

憲宗子五人曰班禿大王曰阿速歹大王曰玉龍荅失大王曰河

平王昔里吉曰辯都辯都早薨史皆失其所出

班禿大王亦曰八里土其事佚

阿速歹大王亦曰阿速帶亦曰阿速台憲宗伐宋留和林阿里不哥稱兵塔塔兒台護憲宗靈輿北葬旣而逃歸阿里不哥執而欲殺之阿速歹及玉龍荅失曰塔塔兒台乃太師國王之裔不可殺也後與阿里不哥同歸上都世祖待之如初

玉龍荅失大王亦隨阿里不哥歸上都者世祖賜之駝紐金印初太宗以衛輝民戶食憲宗憲宗三年籍戶得三千三百以給阿速歹至是阿速歹薨世祖並以予玉龍荅失並歲賜銀五千兩幣三百玉龍荅失薨子二人曰撒里蠻王曰衛王完澤撒里蠻王嘗從河平王昔里吉執北平王那木罕漢軍都元帥李庭帥師出哈刺和林越嶺北撒里蠻與戰而敗其後撒里蠻悔過誘執昔里吉以

元書 卷四十二 九  
降數歲薨完澤亦曰完者以元貞二年賜塗金龜紐印大德九年封衛安王換金印駝紐至大三年進封衛更換獸紐印曰衛者因其食邑也完澤薨子曰郟王徹徹禿亦曰闍闍禿曰徹徹篤曰薛徹禿至治二年命總兵北邊封爲武甯王賜螭紐金印泰定帝立命月脩佛事以卻寇兵三年來朝命仍還鎮天厯元年徹徹禿往迎明宗於金山明年致明宗命立文宗爲皇太子至順二年以駙馬不顏帖木兒來朝進封郟換獸紐印徹徹禿鎮邊有勞累朝恩澤優渥至甯宗時食以海甯州三縣命鎮遼陽順帝時益食以太平路復以完者帖木兒王平江田二百頃改賜焉左丞相唐其勢之反徹徹禿發其謀也後至元五年爲右丞相伯顏所擅殺帝怒明年伯顏貶死自徹徹禿改父封號別給食邑朝廷乃封寬徹哥爲衛王仍食衛輝至正十一年寬徹哥受命帥大軍出征河南妖

賊其後事佚史亦失其世

河平王昔里吉亦曰失烈吉曰習怯吉曰昔里給曰昔烈吉曰昔列吉至元元年隨阿里不哥歸於上都五年封河平賜金印駝紐其分地在金山北時海都先稱兵昔里吉怨世祖之立而不爲憲宗嗣也遂與海都通並煽惑諸王使貳世祖世祖知西道諸王多懷二心而是時方有事於宋乃命北平王那木罕鎮阿力麻里右丞相安童行中書省樞密院事以輔之十三年昔里吉以諸王攻阿力麻里禽牙忽都王掠憲宗所御大帳以爲其父故物也安童遂襲破禾忽大王部曲以震恐諸王於是諸王滋益怒明年昔里吉以諸王兵入阿力麻里執那木罕而械繫安童以歸且大發兵以犯和林會伯顏平宋還世祖乃命備禦北邊其歲伯顏大破昔里吉於斡兒寒河牙忽都脫歸復得大帳昔里吉爲少戢十九年



昔里吉思更倚海都方謀以那木罕歸之弗及納而爲其兒子撒里蠻誘執以降或曰李庭禽昔里吉以獻於只必帖木兒王殺之非其實也子二人曰兀魯思不花王曰并王晃火帖木兒兀魯思不花亦曰兀都思不花昔里吉旣執猶從諸王寇邊大德元年始與玉木忽兒來降時成宗以博羅歡之言赦而更厚賜之泰定元年以與鐵失逆謀流之海島死晃火帖木兒延祐四年封嘉王泰定二年徙封并至順三年命以安陸爲食邑後至元元年左丞相唐其勢與右丞相伯顏爭權因謀廢帝而立并王事敗晃火帖木兒自殺子三人曰嘉王火兒忽曰荅沙亦思的王曰撫甯王徹里帖木兒火兒忽以晃火帖木兒徙并卽襲號嘉王晃火帖木兒死子孫並流邊地其後悉赦之至正二年復封徹里帖木兒爲撫甯王八年監察御史張楨上言伯顏賊殺宗室嘉王郊王一十二口

稽之古法當伏門誅蓋以晃火帖木兒之死爲枉焉

論曰昔里吉直好亂耳所謂其父殺人其子行劫者也會亦思其父之得國義乎不義乎孰作之備而何足以怨世祖哉處寬大之朝莫遠具邇庶幾行葦之露子孫皆得生全復寵以茅土不亦幸乎

曾延棠

門人曾廣謨 刊

門人曾廣沂

門人曾傳一 襄校

門人曾士琮 詳校

元書卷四十一

元書卷四十三

邵陽曾廉撰

耶律楚材劉秉忠列傳第十八

耶律楚材字晉卿亦曰移刺氏曰曳刺氏遼東丹王突欲八世孫也父履為金尚書左丞傳在金史履家廣甯故楚材為廣甯人楚材生三歲而孤母楊氏教之學及長以宰相子例試補省掾除開州同知貞祐二年宣宗遷汴行中書事完顏復興辟為左右司員外郎太祖定燕求遼後得楚材召見之楚材為人開朗樸厚有治國之才兼能綜覈而身長八尺美髯聲宏太祖偉之曰遼金世讎今為汝雪之對曰臣父祖皆委質焉既為之臣敢讎君耶太祖重其言遂呼曰吾圖撒合里而不名吾圖撒合里者言長髯人也適夏人常八斤以善弓有寵每自矜曰國家方用武耶律儒者何為

楚材曰治弓尚須用弓匠治天下豈可不用天下匠耶太祖聞之愈喜日益親任嘗指謂太宗曰此人天生以大我家者也從太祖西征數年太祖至東印度駐鐵門關有一角獸鹿身馬足其色綠作人言謂侍衛曰汝主宜早還太祖以問楚材對曰是名角端能言四方言好生而惡殺此天降瑞獸以告陛下也太祖於是班師及克西夏諸將爭取子女金帛楚材獨收遺書大黃諸藥材而已是時元方興沙漠刑賞未有定制將吏多貪暴無人理燕京行省咸得不尤甚常殺人盈市楚材聞之泣下卽入奏請禁州郡擅徵發凡大辟必待報違者罪死未幾帝崩於撒里川拖雷太子監國而咸得不至縱其親黨白晝劫掠楚材乃與塔察兒往治之戮其首十六人燕乃獲安明年太宗將卽位楚材以國俗無等威乃告親王察合台曰王雖兄臣也禮當拜王拜則莫敢不拜矣察合台

從其言元家尊屬有拜禮自此始太宗旣定位楚材知國制之亟宜立也乃奏寬諸朝會後期者始頒赦令又條便宜一十八事大略言宜以長吏牧民萬戶治軍無相統攝非奉命敢擅行科差者罪之貿易借貸官物者罪之蒙古畏吾兒河西諸人種地不納稅者死監主自盜官物者死復申大辟待報之禁又請禁斷諸貢獻者帝不允楚材曰此蠹民之由也帝曰朕皆從卿奏卿不能從朕一事耶旣而近臣有言漢人無補於國可悉空其人以爲牧地楚材曰此陛下南伐軍資所出也奈何空之乃奏立燕京十路徵收課稅使凡長貳悉用士人寬厚長者而以省部舊人爲之參佐逾年帝至雲中十路咸進課籍凡銀五十萬兩帛八萬匹粟四十餘萬石悉如楚材所定帝大喜卽日拜中書令事無巨細皆先白令楚材乃舉鎮海粘合重山爲左右丞相凡所掌稅課權貴不得侵

元書 卷四十三 二  
之權貴由此不平咸得不以舊怨因乘閒譖於國王幹嗔那顏言  
楚材率用親舊必有二心國王以聞帝不聽屬有訟咸得不不法  
者命楚材鞠之楚材以其功臣子也請貸之帝歎爲長者中貴可  
思不花奏采金銀役夫及種田西域與栽葡萄戶帝令於西京宣  
德徙萬餘戶充之楚材曰先帝遺詔山後民質樸無異國人緩急  
可用不可輕動帝從之汴梁將下大將速不台請從國舊制正金  
人抗拒之罪屠之楚材曰將士暴露數十年所欲者土地人民耳  
得地無民將焉用之且奇巧之工厚藏之家畢萃於此若盡殺之  
將無所獲帝又從之詔罪止完顏氏而已楚材又請遣人入城求  
孔子後曰元措奏襲封衍聖公付以林廟地命收太常禮樂生及  
召名儒梁陟王萬慶趙著使講九經又率大臣子弟執經解義俾  
知聖人之道置編脩所於燕京經籍所於平陽由是文治興焉而

是時河南民多被俘在道十七八逃還有旨居停逃民及資給者  
滅其家鄰里亦連坐因是路多流殍楚材從容言曰河南旣平民  
皆陛下赤子走復何之奈何因一俘連死數十百人乎帝悟除其  
禁其大官留諸俘寄他郡者因括戶並令爲民匿占者死時又議  
四征不庭當遣回回人征江南漢人征西域楚材曰此兩拂其性  
也西域中原相去遼遠未至敵境人馬已疲兼水土異宜疾疫將  
生是自困吾國也帝然其言八年諸王大集帝親觴楚材曰朕推  
誠任卿先帝之命也今朕得安枕卿之力也忽都忽以定民籍奏  
帝欲裂州縣分諸王功臣楚材曰裂土分民易生嫌隙若朝廷置  
吏收其貢賦歲終頒之使無擅科徵可也遂定以五戶絲給之而  
常賦皆自是定語在食貨志然當時多言賦輕楚材曰作法於涼  
其弊猶貪後將有以利進者則此爲重矣楚材見天下稍靖乃請

試儒士以宣德宣課使劉中隨郡校之儒士被俘爲奴者亦令就試得四千三十人免爲奴者四之一遂一衡量給符印立鈔法定均輸布遞傳明驛券禁行羔羊息語在太宗紀又陳時務十策曰信賞罰正名分給祿俸官功臣考殿最均科差選工匠務農桑定土貢制漕運皆施行焉旣而太原轉運使呂振副使劉子振以贓抵罪帝責楚材曰卿言儒者行孔子之教爲好人何乃有此對曰聖人之教如天之有日月也豈得緣一夫之失廢萬世常行之道乎帝意乃解自太宗二年定課稅格至六年平河南歲有增羨至十年課銀增至百一十萬兩富人劉忽篤馬等欲以百四十萬兩撲買之楚材曰此貪利之徒罔上虐下爲害甚大奏罷之因言興一利不如除一害生一事不如省一事已而奧都刺合蠻撲買焉又增至二百二十萬帝許之楚材極力辨諫聲色俱厲言與涕俱

帝曰汝欲搏鬪耶欲爲百姓哭耶楚材力不能止乃歎曰民自此困矣太宗素嗜酒楚材屢諫不聽乃持酒槽鐵口進曰麴蘖能腐物鐵尙如此况五臟乎帝語近臣曰汝曹愛君憂國之心有如吾圖撒合里者乎然迄不能改十三年大獵還歡飲極夜遲明而崩遺詔立失烈門皇后乃馬真氏意不謂然召問楚材對曰此自有先帝遺詔后不從遂稱制自是奧都刺合蠻遂以貨得政后至以御寶空紙付奧都刺合蠻使自填行之楚材曰天下者先帝之天下朝廷自有憲章今欲紊之臣不敢奉詔乃止又有旨凡奧都刺合蠻所建白令史不爲書者斷其手楚材曰國之典故先帝悉委老臣令史何與焉事若合理何不可行如其不合死且不避况截手乎后不悅楚材辨論不已因大聲曰老臣事成吉思皇帝及先皇帝二十餘年無負於國皇后亦豈能無罪殺臣也后雖憾之亦

以先朝舊勳深敬憚焉后稱制之三年竟以憂薨於位后爲之哀  
悼賻贈甚厚楚材以匡國濟民爲己任元代粗立紀綱賴焉當國  
日久得祿輒分親族未嘗私以官劉敏嘗從容言之楚材曰睦親  
之道如是而已若使從政而違法吾不能顧私恩也平日泊然無  
嗜欲亦深味禪悅嘗曰以佛治心以儒治世薨後有譖諸后言其  
專利者后命覆視之惟琴阮十餘張及古今書畫金石遺文數千  
卷而已然博極羣書旁及天文術數嘗著庚午元秣語在秣志而  
世顧傳其占推多靈驗非其大者故不錄焉憲宗時覈其食邑在  
大都八百七十戶至順元年贈經國議制寅亮佐運功臣太師上  
柱國廣甯王諡文正子鉉鑄鉉監開平倉

進焉憲宗時命覈錢糧於燕旣而召還和林復扈從伐蜀詔領侍  
衛驍果屢出奇計攻下城邑賜以上方金鎖甲及內殿驄馬無何  
憲宗崩師還至六盤時世祖已卽位而渾都海反應阿里不哥鑄  
說渾都海使入朝不從鑄卽挺身棄妻子歸於世祖渾都海徐知  
鑄去怒遣百騎追之不及鑄至燕世祖嘉其忠也卽日召見賞賜  
優渥中統二年拜左丞相監修遼金史其歲詔將兵備禦北邊阿  
里不哥之敗也鑄扈從世祖親在行間與有功焉明年復命詣北  
京餉諸王軍至元元年加光祿大夫奏定法令三十七章吏民便  
之命出行省事於山東尋復徵還中書三年同諸宰執並罷明年  
復爲左丞相初清廟雅樂止有登歌詔中書製宮縣八佾之舞於  
是以左三部太常寺少府監置局於興禪寺鑄領其事乃議選石  
材以爲編磬八音遂正至是樂成表上之請賜名大成樂制曰可

尋例降榮祿大夫平章政事五年復爲光祿大夫左丞相七年又與左丞廉希憲並罷十年詔平章軍國重事復詔監修國史朝廷有大事必咨訪焉十九年復爲左丞相奏量采室女復改正蒙古人殺人徵鈔之例踰年坐不納職印妄奏東平人聚謀爲逆聞謀幕僚及黨罪囚阿里沙遂斥免仍沒其半貲徙居山後二十二年卒至順元年贈推忠保德宣力佐治功臣太師開府儀同三司上柱國懿甯王諡文忠子十一人顯者希亮希逸希逸淮東宣慰使希亮字明甫初昭慈皇后命以赤帖氏歸鑄生希亮於和林南之涼樓曰脫忽思后遂以其地名之故希亮亦名脫忽思焉希亮年九歲鑄奉命之燕因留請攜子就傅時希亮已能賦詩鑄還而希亮留於燕逾二歲馳見憲宗於六盤山遂侍鑄入蜀旣而北歸復至六盤鑄獨歸朝而希亮母子兄弟遂爲渾都海所監守復脅之

西行未幾渾都海敗死於甘州希亮因潛匿州北黑水東沙陀中殘卒忽得之仍驅而西是時諸潰兵皆歸哈刺不花鑄之姻舊也鑄昔待之有恩遂釋希亮縛謂曰此所以報汝父也於是希亮渡馬刺思河北至葉密立城定宗子大名王禾忽分地也時昭慈皇后女弟主定宗后位與禾忽皆欲東覲希亮母知之因攜入見已而不果東而王閔希亮流離遺以幣帛鞍馬復贈以大珠耳環金束帶希亮辭環受帶俄又爲亂兵西驅更南至押兒牽城會于闐王阿魯渾興師與禾忽合殲哈刺不花之眾於不刺城希亮從之又從征阿里不哥餘眾至渾八升城而世祖以璽書召希亮希亮展轉天山南北間三四年至是始馳驛自苦先出合刺火州東涉大漠以還入覲世祖於大安閣備陳邊事徐及羈旅困苦狀世祖甚憐之賜之逾等命爲速古兒必閣赤數歲除符寶郎旣平宋帝

使之間諸降將夏貴等日本可伐否皆曰可希亮奏曰宋與遼金  
攻戰且三百年干戈甫定侯稍息肩興師未晚也帝然之太府監  
令史盧贄以平陽貢布長於諸路每啟諸怯薛歹之爭因請於監  
官截其所長者用以髹漆宮殿諸器適左右以聞而不言所以帝  
以詰監官倉卒亦莫能對也遂歸罪於贄將斬之希亮遇諸塗以  
冤告令緩行刑而以其實奏帝乃命董文忠識之贄得釋而帝召  
御史大夫塔察兒等責之曰此言官當言而不言向微脫忽思不  
誤殺人耶十四年以爲禮部尙書遷吏部帝如上都侍臣脫兒察  
誤傳旨言漢人盜鈔六文者斬因是獄多囚希亮請明其誤以安  
人心卽命希亮至大都宣諭焉更三歲希亮以跋涉西土足癱攣  
乃謝事居灤陽二十餘年至大二年武宗訪求舊臣特除翰林學  
士承旨知制誥兼脩國史因類次世祖嘉言善行以進英宗取其

書置禁中久之閒居京師泰定四年卒贈推忠輔義守正功臣資  
善大夫集賢學士上護軍漆水郡公諡忠嘉希亮性至孝困厄遐  
方家貲散盡僅藏祖考畫像四時就穹廬陳列致奠沙漠之人咸  
相聚觀歎曰此中土之禮也雖疾病不廢書史或中夜起坐取燭  
以書所著撰具藝文志

劉秉忠字仲海其先北京瑞州人也世仕遼爲官族曾祖仕金爲  
邢州節度副使因家焉遂爲邢人父潤太祖時爲邢州都元帥府  
都統歷鉅鹿內邱兩縣提領秉忠生而風骨秀異初名侃八歲入  
學日誦數百言年十三爲質子於帥府十七爲府令史以養其親  
本英爽不羈以汨沒下吏常鬱鬱不樂一日棄去隱武安山中久  
之天甯寺僧招致入釋乃名子聰以其能文辭使掌書記因呼爲  
聰書記後游雲中留居南堂寺世祖在藩邸僧海雲被召過焉邀



與俱行既入見應對稱旨世祖大愛之遂見留數歲奔父喪賜百金爲之葬具三載服食貶損容貌哀戚服除復被召因上書數千百言其略曰典章禮樂法度三綱五常之教備於堯舜三王因之五霸敗之漢興至於五代一千三百餘年由此道者漢文景光武唐太宗元宗而元宗不無疵也然治亂之道繫乎天而由乎人天生成吉思皇帝起一旅降諸國不數年而取天下勤勞憂苦遺大寶於子孫庶傳萬祀永保無疆之福愚聞之曰以馬上取天下不可以馬上治昔武王兄也周公弟也周公思天下善事夜以繼日坐以待旦周傳國八百餘年周公之力也今君上兄也大王弟也可不思周公之故事而行之乎愚聞君之所任在內莫大乎相相以領百官化萬民在外莫大乎將將以統三軍安四域內外相濟國之急務必先之也是在得人焉耳然天下之大非一人之可及

萬事之細非一心之可察故立朝省以統百官必分有司以御眾事天下莫大於朝省親民莫近於縣宰縣宰正民自安矣竊謂宜擇開國功臣子孫分爲京府州郡監守督責舊官以遵王法仍差按察官守定其黜陟其前此天下不治者惟官無定次潔清者無以遷汙濫者無以降也竊意可比附古例定百官爵祿儀仗使家足身貴有犯於民設條定罪綱紀正於上法度行於下天下當不勞而治也至帝胄功臣大官以下章服有制外無職之人不得僭越此又所以明法度也夫明君用人如大匠用材隨其巨細長短以施規矩繩墨孔子曰君子不可小知而可大受小人不可大受而可小知蓋君子所存者大不能盡小人之事或有一短小人所拘者狹不能同君子之量或有一長盡其才而用之成功之道也君子不以言舉人不以人廢言大開言路所以成天下安兆民也

元書 卷四十三  
天地之大日月之明而或有所蔽蔽天之明者雲霧也蔽人之明者私欲佞說也常人有之蔽一心也人君有之蔽天下也故官常選左右諫臣使諷諭於未形忖畫於至密也君子之心一於理義懷於忠貞小人之心一於利欲懷於讒佞君子得位有容於小人小人得勢必排於君子明君在上不可不察也孔子曰遠佞人又曰惡利口之覆邦家者此之謂也今言利者眾非圖以利國益民實欲殘民而自利也天子以天下爲家以兆民爲子國不足取於民民不足取於國相須如魚水故有國家者置府庫設倉廩亦爲助民民有身家營產業闢田野亦以資國用也古者治世均民產業自廢井田爲阡陌後世不能復今窮乏者益損富盛者增加誠禁行利之人勿恃官勢居官在位者無侵民利商賈與民和好交易不生擅奪欺罔之害眞國家之利也今地廣民微自忽都虎那

顏斷事以來差徭甚大加以軍馬調發使臣煩擾官吏乞取民不能堪故多逃竄又自耶律中令拘括鹽鐵諸產商賈酒醋貨殖諸事以定宣課已不爲輕輿都刺合蠻加倍權之往往科取民間科權並行民安所措手足哉竊謂宜比舊減半或三之一就見在之民以定差稅關西河南地廣土沃宜設官招撫不數年民歸土闢以資軍馬之用又宜差勸農官二員率天下百姓務農桑重本業而從舊例辦權或減輕罷繇碎止科徵其國中人民必用場冶亦宜付課稅所以定所權其餘言利者並行罷去無縱獻利之徒削民害國其官民所負宜依汗皇帝聖旨一本一利官司歸還凡無名虛契及還過元本者並行豁免納糧宜令從近倉當驛路州城飲食祇待宜計所費以準差發使臣到州郡宜設館舍不得居官衙及民家倉庫加耗甚重宜令權量度均爲一法使錙銖圭撮尺

寸皆平以存信去詐至珍貝金銀之所出淘沙鍊石罷民而取之  
一旦以纏絲縷綴皮革塗木石飾器仗取一時之華麗廢爲塵而  
無濟甚可惜也古者明王不寶遠物所寶惟賢誠使賢者在位能  
者在職此皆一人之睿哲賢王之輔成也至於鰥寡孤獨廢疾者  
宜設孤老院給衣糧以爲養此又王者之不可不費也夫威福者  
君之權也奉命者臣之職也今百官自行威福進退生殺惟意之  
從天下之民未聞教化如之何其厲之也竊謂見在囚人宜從赦  
免明施教令使之知畏則犯者自少也然教令之設不可以繇因  
大朝舊例增益民間所宜設者十數條足矣教令既施罪不至死  
者皆提察然後決犯死刑者皆覆奏然後定至於笞箠之制亦宜  
會古酌今均爲一法使無過越私置牢獄淫民無辜鞭背之刑悉  
宜禁治以彰好生之德此挈威福歸之上也古者庠序學校未嘗

廢今郡縣雖有學並非官置宜從舊制建設三學設教授開選擇  
才以經義爲上詞賦策論次之兼科舉之設已奉汗皇帝聖旨矣  
因而成之易行也開設學校宜擇開國功臣子孫受教選達才任  
用之孔子爲百世師立萬世法今廟堂雖廢存者尙多宜令州郡  
祭祀釋奠如舊儀近世禮樂器具靡散宜令括會徵太常舊人教  
引後學使器備人存漸以修之實太平之基王道之本也今天下  
廣遠雖成吉思皇帝威德之致亦天地神明陰所祐也宜訪名儒  
循舊禮尊祭上下神祇和天地之氣順時序之行使神享民依德  
極於幽明天下賴一人之慶見行遼秣日月交食頗差聞司天改  
成新秣未見施行宜因新君卽位頒秣改元令京府州郡置更漏  
使民知時國滅史存古之常道宜撰修金史令一代君臣事業不  
墜於後世甚有勵也此皆非儒莫能行也國家廣大如天萬中取

一以養天下名士宿儒之無營運產業者使不至窮困或有營運產業者會前聖旨止應輸差稅其餘大小雜泛并行蠲免使自給養實國家養才勵人之大也世祖嘉納其言初太宗時賜世祖食邑於邢因與張文謙言邢舊萬餘戶兵興以來不滿數百誠得良守牧如真定張耕洺水劉肅者猶可完復也世祖遂承制以耕爲邢州安撫使肅爲商榷使不期月流民復業由是世祖益重儒士嗣憲宗命世祖征大理及伐宋復與姚樞張文謙共贊世祖以天地之好生王者之神武不殺故世祖所至輒止戮掠及世祖卽位問以治天下之大經養民之良法乃采祖宗舊典參以古制宜於今者條列以聞於是下詔建元紀歲立中書省宣撫司朝廷舊臣山林遺逸之士咸見錄用文物粲然新矣然雖居左右有年而不改舊服時人猶稱之聰書記至元元年翰林學士承旨王鶚上言

子聰參謀帷幄定社稷之大計忠勤勞績宜被褒崇聖明御極萬物維新而子聰猶仍其野服散號所未安也帝乃詔復其姓賜名秉忠卽日拜光祿大夫位太保同議樞密院事參議中書省事又詔以翰林學士竇默之女妻秉忠賜第奉先坊給以少府宮籍監戶秉忠旣受命益思以天下爲己任事無巨細凡關國家大體知無不言言無不盡帝寵任愈隆燕閒顧問輒推薦人物可備器使者凡所甄拔後悉爲名臣初帝命秉忠相地於桓州東灤水北建城郭於龍岡三年而畢名曰開平繼升爲上都而以燕爲中都四年又命秉忠築中都城始建宗廟宮室八年奏建國號曰元而以中都爲大都遂頒章服舉朝儀定官制給祿俸皆自秉忠發之爲一代成憲事在禮樂諸志亦皆略如其昔上書所言也秉忠嘗築精舍於上都南屏山十一年薨於精舍帝聞驚悼謂羣臣曰秉忠

元書 卷四十三  
事朕三十餘年小心慎密不避艱險言無隱情其陰陽術數之精占事知來若合符契惟朕知之他人莫得聞也出內府錢具棺斂遣禮部侍郎趙秉溫護其喪還葬大都十二年贈太傅趙國公諡文貞成宗時贈太師諡文正仁宗時又進封常山王秉忠於書無所不讀尤精於易及邵氏皇極經世書至於天文地理律秣三式之屬無不洞徹而好學至老不衰雖位極人臣而齋居蔬食終日澹然不異平昔自號藏春散人每以吟詠自適其詩蕭散閑淡類其爲人有集見藝文志無子以弟秉恕子蘭璋爲後桑哥當國覬其土田收之猶曰秉忠無子也桑哥旣誅秉忠妻竇氏乃上言秉忠有嗣息帝乃命還其田百頃秉恕字長卿受易於劉肅位禮部吏部侍郎歷順德安撫使彰德懷孟淄萊順天太原五路總管皆有惠政召除禮部尙書復出宣慰淮西改湖州總管移太原卒於

官

論曰世每豔稱楚材秉忠術數之精以爲國所由開也鄙哉言乎二子規畫恢恢忠誠愷悌類非管蕭以下所可及矣其欲救斯民於水火豈非務導君心於仁者乎然以太宗世祖之明而皆以利自卑其量其汲黯所謂內多欲而外施仁義者耶孟子言人不足責政不足閒惟大人爲能格君心之非若大人者焉敢以望於二子哉

元書卷四十三

羅金聲  
刊  
曾厚

門人曾傳魯襄校

門人曾士琮詳校

元書卷四十四

邵陽曾廉撰

王楸郝經列傳第十九

王楸字巨川鳳翔虢人也性倜儻弱冠舉進士不第卽入終南山讀書涉獵孫吳泰和中詣闕上書論當時急務金主使給事縉山元帥府尋用薦特賜進士出身授副統軍太祖軍南下楸鏖戰三日而敗執至將戮之神色不變太祖詰讓對曰我以布衣受恩誓捐軀報國今旣僨軍得死幸矣太祖義而釋之以爲都統令招集山西潰兵從哲別破紫荆關進取涿易等州楸說雄州節度使以城降進宣撫使兼行尙書六部事復從石抹明安圖燕出古北口降漢軍數萬遂圍中都明年中都下楸請禁虜掠以慰民望又以人多飢死令城中民與城外軍通糴易士得金帛而民獲粒食又

知軍回所驅牛多差官於盧溝橋索牛以給農民由是復業者眾  
檄復往招諭河北東路多降遂置行司於滄州以鎮之俄從明安  
入覲授銀青榮祿大夫仍前職兼御史大夫世襲千戶而河閒清  
滄復叛帝命檄從駙馬孛朶討之命孛朶分兵三千與檄遂復河  
閒得軍民萬口孛朶惡其反覆欲盡誅之檄曰牧羣羊使東西者  
牧人也羊何知焉不若但殲其渠魁而遷餘眾於近縣使強者從  
軍弱者爲農此天之所以畀我也孛朶曰能保其不復反乎檄曰  
可遂皆全活帝命闍里必與皇太弟國王斡噶分撥諸侯王城邑  
諭之曰漢人中王宣撫者可任使也遂以前職兼判三司副使後  
又命括歸附工匠俾大臣掌之太師阿海具諸大臣名以聞帝曰  
朕有其人偶忘姓名旣而曰得之矣王宣撫也遂以命檄二十一  
年馳從太祖軍以征西夏時夏人盡徹橋梁爲備軍阻不得前檄

夜督士卒運木石比曉而橋成乃濟軍明年太祖崩又明年檄以  
監國公主之命領省中都中都時廟學旣燬於兵檄重創於舊樞  
密院地春秋率諸生行釋菜禮仍取舊岐陽石鼓置廡下屬金將  
張進據信安其黨李密在北山轉掠近縣檄曰此根本地何可無  
備遂引水環城調度經費檄自爲券假之賈人而斂不及民人心  
稍安遣子守謙擊賊平之太宗二年從征關中圍鳳翔明年克之  
請入城訪求親族得族人數十口以歸四年從攻汴京明年持國  
書使於宋宋人甚禮重之檄前後凡五往會宋人敗盟以兵入汴  
太宗怒遂構兵檄以和議未能決隱憂致疾卒於宋宋人重贈之  
遣使歸其柩葬於燕

郝經字伯常澤州陵川人也祖天挺在金史隱逸傳父思溫以金  
末從天挺避地河南河南亦亂居民匿窖中多爲亂兵以火熏灼

致死經母亦罹其害經以蜜和寒菹汁決母齒灌之而蘇時經九歲人皆異之金亡徙順天家貧負薪以養暮則讀書爲守帥張柔賈輔所知延爲上客二家藏書皆萬卷經博覽無不通憲宗元年世祖開邸金蓮川召經經條上數十事大悅遂留王府是時連兵於宋憲宗入蜀世祖總統東師經從至濮會有得宋人奏議以獻其言謹邊防守衝要凡七道遂下諸將議經曰古之一天下者以德不以力今宋未有敗亡之釁我乃空國而出諸侯窺伺於內小民凋弊於外經見其危未見其利也王不如脩德布惠敦族簡賢綏懷遠人控制諸道結盟飭備以待西師上應天心下繫人望順時而動宋不足圖也世祖以經儒生愕異焉復進七道議七千餘言乃以經副楊惟中宣撫江淮荆湖諸路經將歸德軍先至江上大布恩信招納降附是時憲宗久頓兵於蜀經進東師議其略曰

國家以一旅之眾奮起朔漠遂滅金源并西夏蹂荆襄克成都平大理蹂躪諸夷奄征四海有天下十八盡元魏金源故地而加多廓然莫與侔大也惟宋不下連兵構禍逾二十年何曩時之易而今日之難也夫圖天下有以力有以術力則不可久久則頓弊而不振術則不可急急則僥倖而難成自漢唐以來樹立攻取未有逾十年者晉之取吳隋之取陳經營比倏亦十有餘年而已國家建極開統垂五十年而一之以兵遺黎殘姓游氣驚魂虔劉劇盪彌焉殆盡自古用兵未有如是之久且多也且括兵索賦朝下令而夕出師闔國大舉以圖混一故以志則銳以力則強以土則大而其術則未盡也苟於諸國既平之後息師撫民致治成化創法立制敷布條綱任將相選賢能鳩智計平賦屯農治內及外而後伺隙觀釁以正天伐自東海至襄鄧重兵數道以爲正兵自漢中



六書 卷四十四 三  
至於大理輕兵捷出以爲奇兵帥臣得人師出以律高拱九重之內而海外有截矣舍是而不爲遽爲大舉兵連禍結底安於危蓋國家用兵聚如邱山散如風雨迅如雷電捷如鷹鷂本長於用奇然攻其無備出其不意則用奇豈有連百萬之眾首尾萬里六飛雷動乘輿親出竭天下倒四海而用奇者乎竊謂王宜遣人稟命行在大軍壓境遣使喻宋令降名進幣割地納質彼必受命姑偃兵息民以全吾力而圖後舉天地人神之福也稟命不從乃先申文移喻以禍福使知王仁而不殺之意然後假西師以爲奇而用吾正以一軍出襄鄧一軍出壽春一軍出維揚三道並進王處一軍爲之節制旣入其境敦陳固列緩爲之行彼善於守而我不攻彼恃城壁以不戰老我我合長圍以不攻困彼選出入便利之地爲久駐之基示必取之勢毋焚廬舍毋傷人民開其生路以攜其

心亟肆以疲多方以誤一處崩壞則望風皆潰是晉取吳隋取陳宋取南唐之術也不然彼渡江立國百有餘年君臣輯睦內無釁隙東西南北廣輪萬里亦未可小自敗盟以來日討軍實徬徨百折當我強對未嘗有大敗不可謂弱若直前奮迅銳而圖功一舉而下金陵舉臨安則可也如兵力耗敝役成遷延進退不可反爲所乘悔可及乎固宜慎重詳審圖之以術若前所陳以全吾力是所謂坐勝也雖然猶有可憂者國家掇取諸國飄忽凌厲本以力勝今爲大舉若措置失宜無以挫英雄之氣服天下之心則稔惡懷姦之流得以窺其隙而投其閒國內空虛易以搖蕩則未然之慮方長也世祖不能用遂會兵圍鄂州會憲宗崩經復進議曰易言知進退存亡而不失其正者其惟聖人乎國家自平金以來惟務進取老師費財三十年矣今盤桓江渚舉天下兵力不能取一

城而諸軍疾疫已十四五宋人聞我國疵鬪氣自倍且兩淮江西嶺廣之兵以次而至如邊截於江黃津渡邀遮於大城關口塞漢東之石門限郢復之湖灤則我將安歸就使自救之師未暇謀我而吾國內空虛塔察兒諸王觀望所立莫不覬覦神器一有狡焉或啟戎心先人舉事腹背受敵大事去矣且阿里不哥已令脫里赤行省燕都號令諸道行皇帝事矣雖大王素有人望且握重兵獨不見金海陵世宗之事乎願大王亟定大計與宋議和許割淮南漢上梓夔兩路定疆界歲幣置輜重以輕騎歸直造燕都則彼之姦謀僭志冰釋瓦解遣一軍逆蒙哥汗靈輿收皇帝璽分遣使召旭烈兀阿里不哥末哥及諸王駙馬會喪和林差官於汴京京兆成都西涼東平西京北京諸路撫慰安輯召真金太子鎮燕都示以形勢則大寶有歸而社稷安矣會宋守帥賈似道亦遣間使

請和乃班師明年世祖卽位以經爲翰林侍讀學士佩金虎符充國信使使於宋告卽位且定和議仍敕沿邊諸將無鈔掠經入辭帝曰朕初卽位庶事草創卿當遠行凡可輔朕者亟以聞經奏便宜十六事曰大有爲以定基統嚴備禦以防不虞定都邑以示形勢置省部以一紀綱建監司以治諸鎮誅凶渠以示勸懲親諸王以庇根本行寬政以結人心赦罪戾以去舊污罷冗官以紓民力總錢穀以濟國用減吏員以哀良民堅凝果斷以成中興擴充誠明以絕猜阻明賞罰以定功過定儲貳以塞亂階皆立政大要也時經有重名平章政事王文統忌之既行文統陰屬李璫潛師侵宋欲假手害經經至濟南璫以書止經經以璫書聞於朝而行宋敗璫師於淮安經至宿州遣副使劉仁傑請入國日期不報時賈似道方以卻敵爲功恐經至謀泄遂以李璫爲辭拘之眞州經上

表宋主曰願附魯連之義排難解紛豈如唐儉之徒款兵誤國又數上書宋主及宰執極陳戰和利害且請入見及歸國皆爲似道所匿驛吏棘垣鑰戶晝夜守邏欲以動經經不屈及丞相伯顏南伐宋懼以禮送經歸賈似道謀泄尋竄死經歸道病帝遣樞密院及尙醫近侍迎勞所過父老瞻望流涕明年至闕錫宴大廷咨以政事賞賚有差尋卒官爲護喪還葬諡文忠明年宋平經爲人尙氣節爲學務有用及被留思託言垂後撰述具藝文志其文豐蔚豪宕善議論詩多奇崛拘宋十六年從者怒與宋鬪死者數人其存者皆通於學書佐苟宗道後官至國子祭酒有文譽經還之歲汴中民射雁金明池得繫帛書詩云霜落風高恣所如歸期回首是春初上林天子援弓繳窮海累臣有帛書後題曰中統十五年九月一日放雁獲者勿殺國信大使郝經書於眞州忠勇軍營新

館其忠誠如此當時中統已改至元經音問闕絕不知也二弟彝庸皆有名彝字仲常庸字季常終潁州守子采麟仕至山南江北肅政廉訪使

論曰檄五至宋宋人禮重之檄之時國無王文統宋無賈似道也然檄以和議未決隱憂而卒何耶觀於經議而後知和非但宋之利亦元之利矣故世祖初亦無必滅宋之心阿朮旣平襄陽則曰宋師弱於往日此足以知其往日之強也故檄非憂其國之不足以勝宋也憂夫兵連禍結而生民將盡也嗚呼賈似道不冒功則經足通好經通好則混一之期尙早也而守境息民亦元魏宋齊梁之續矣天欲亾宋故生似道以拒經其後三道出師及漠北搖蕩皆不出經之素畫經其儒也哉

劉鰲

羅金聲 刊

曾厚

門人曾紀嶼襄校

門人曾士琮詳校

元書卷四十四

元書卷四十五

邵陽曾廉撰

楊惟中趙璧張文謙宋子貞列傳第二十

楊惟中字彥誠宏州人也蚤事太宗知讀書有膽略太宗器之年二十奉命使西域三十餘國宣暢國威敷布政條俾皆籍戶口乃歸太宗於是知其可大用也會命皇子曲出伐宋即命惟中於軍前行中書省事惟中為人威明屬元初尚武簡賤儒流惟中獨喜獎士類嘗兄事姚樞而薦於朝既受命行省事則請求儒道釋醫卜之流以備國家之用帝即下詔行之復請以姚樞從行師克棗陽光化等軍光隨郢復等州及襄陽德安府惟中皆宣布詔書推廣生生之路凡得名士趙復等數十人已而聞復議論則大嗜其學乃收伊洛遺書送燕都師還遂與樞立太極書院於燕祠宋大

儒周敦頤而延趙復王粹等講授其閒於是遂有志聖賢慨然欲以道濟天下竇默聞其招集儒士亦自德安北歸由是北方知有性理之學儒風以振惟中之力也無何太宗崩昭慈皇后稱制惟中代耶律楚材爲中書令定宗卽位以平陽道斷事官斜徹橫恣不法詔惟中宣慰惟中按誅之金亾其將武仙軍潰鄧州餘黨散入太原眞定閒據大明川用金開興年號衆至數萬剽掠數千里詔會諸道兵討之不克惟中仗節開諭降其渠帥餘衆悉平憲宗立世祖以皇弟開府金蓮川得專封拜乃立河南道經略司於汴奏以惟中等爲使俾屯田唐鄧申裕嵩汝蔡息潁亳諸州初滅金時以監河橋萬戶劉福爲河南道總管福貪鄙殘酷虐害遺民二十餘年惟中至召福福稱疾不至再召之福不得已以數千人擁衛見惟中惟中先已設大梃於坐至則握以擊之仆數日福死河

南肅然遷京兆宣撫使惟中任郎中商挺護字凋殘整理庶政遂請減關中常賦之半時諸軍官尤多橫侈病民千戶郭甲殺人之夫而奪其妻惟中戮之以徇關中大治惟中語人曰吾非好殺願國家紀綱不立善良無所控告雖欲省刑可乎憲宗圍合州之歲世祖總統東師奏惟中爲江淮荆湖南北路宣撫大使俾建行臺以先啟行宣布恩信蒙古漢軍諸帥竝聽節制師還薨於蔡州惟中起自孤童子好學日進歷官將相威望凜然元時漢人得躋元輔耶律楚材楊惟中史天澤而已中統二年諡忠肅

趙璧字寶仁雲中懷仁人也太宗時世祖在藩聞璧名召見呼秀才而不名賜三僮給薪水命后親製衣賜之視其試服不稱輒損益之寵待無比嘗命馳驛往聘名士王鶚等又令蒙古生十人從璧學敕璧習國語譯論語大學中庸孟子又譯大學衍義時從馬

上聽壁陳說詞旨明貫世祖喜焉憲宗卽位召見壁問曰天下如何而治對曰請先誅近侍之尤不善者憲宗不悅壁退世祖曰秀才我爲汝汗汝渾身是膽耶一日斷事官牙老瓦赤持其印請於帝曰此先朝賜也今陛下登極仍之耶抑新之也時壁在旁呵之曰用汝與否取自聖裁乃敢以印爲請耶奪其印置帝前帝默然良久曰朕亦不能爲此也牙老瓦赤先治燕以貪暴聞故壁借端斥之帝後復使之治燕卒無善政也尋帝命壁與賽典赤贍思丁詣燕撫諭軍民明年世祖請以壁與楊惟中忭哥史天澤同經略河南河南總管劉福素不法民間婚嫁必先賂之咸呼爲翁其黨主簿鄭某恃勢尤虐強取民女有邑者三十餘人壁按其罪立斬之盡還民女而福爲惟中挺擊死語在惟中傳憲宗八年爲江淮荆湖經略使從世祖渡江圍鄂中統元年拜燕京宣慰使時府庫

竭於蜀軍及用兵北邊壁經畫饋運相繼不絕中書省立授平章政事議加號荅刺罕壁力辭不受二年從北征命還燕以平章政事兼大都督領諸軍是年始製太廟雅樂而樂工党仲和郭伯達號知律因人連坐繫獄壁曰大饗用樂聖王所以昭孝報本也豈可以無辜牽累而廢雅樂之成哉奏原之三年李壇反從親王合必赤討之壇已據濟南諸軍乏食壁從濟河得粟以饋軍軍復大振至元元年官制行加榮祿大夫改樞密副使六年命詣鹿門山都元帥阿朮營同行漢軍都元帥府事宋將夏貴乘漢漲自武昌援襄陽壁及阿朮大敗之於虎尾洲會高麗王禘爲其臣林衍所逐帝召壁還以爲左丞同國王頭輦哥行東京中書省事聚兵平壤時衍已死壁與國王議曰高麗遷居江華島有年矣外雖臣貢內恃其險故使權臣無所忌憚擅逐其主今衍死而王無罪若朝

護以兵使復國於故京可以休兵息民策之上也因遣使以聞帝從之還朝遷右丞十年復拜平章政事十三年薨大德三年贈大司徒諡忠亮後追封冀國公易諡文忠子仁榮同知歸德府事仁恭集賢直學士

張文謙字仲卿邢州沙河人也幼與劉秉忠同學世祖居藩食邑於邢秉忠薦文謙可用召對稱旨命掌王府書記日侍左右嗣從世祖征大理及伐宋皆與秉忠同進良策忠言及世祖即位立中書省首命王文統平章政事文謙爲左丞建立紀綱講明利弊惟以安國便民爲務詔令一出天下有太平之望而文統小人大言非憂國者又好自用多忌克文謙由是與之不協遂乞外詔以左丞行大名彰德宣撫司事臨發語文統曰民困久矣况當大旱不量減稅賦何以慰來蘇之望文統曰上新即位國家經費止仰

稅賦苟復減損何以供給文謙曰百姓足君孰與不足俟時和年豐取之未晚也於是乃蠲常賦什之四商酒稅什之一文謙至大名未市歲以來朝復留居政府時左右部始立講行庶務鉅細必舉文謙不辭勞瘁明年文統誅而阿合馬領左右部總司財用欲專奏請不關白中書詔廷臣議之文謙曰分制財用古有是理中書不預無是理也若中書不問天子將親蒞之乎帝曰仲卿言是也至元元年復以左丞行省西夏中興等路羌俗素鄙野事無統紀文謙得蜀士陷俘虜者五六人理而出之使習吏事旬月閒簿書有品式子弟亦知讀書俗爲一變又得董文用爲行省郎中文謙事多委之乃浚秦漢及唐故渠由是流亾復歸悉授田種農具更造舟黃河中受諸部落及潰叛來降者中興大安三年還朝諸勢家言有戶數千當役屬爲私奴者議久不決文謙謂以太宗七

年戶籍爲斷奴之未占籍者歸之私家可也其餘良民無爲奴之理議遂定七年拜大司農卿奏立諸道勸農司巡行勸課請開籍田行祭先農先蠶等禮復與竇默請立國子學詔以許衡爲國子祭酒選貴胄子弟教育之文謙自侍潛邸至大位皆以崇儒重民培國本爲心世祖雖仁明然不免動於利是時阿合馬爲尙書平章政事議拘民間鐵官鑄農器高其價以配民創立行戶部於東平大名以造鈔及諸路轉運司干政害民文謙悉於帝前極論罷之十三年遷御史中丞阿合馬慮憲臺發其姦乃奏罷諸道按察司以撼之文謙奏以爲不可罷賴御史大夫玉昔帖木兒夜入帝卧內陳奏始復其舊文謙自是知爲姦臣所忌因力求去會世祖以大明秣歲久寢差命王恂等造新秣乃授文謙昭文館大學士領太史院以總其事十九年拜樞密副使文謙以兵竄將恂乃議

肅兵政汰冗員選練將士而優卹其家未及施行明年薨文謙蚤從劉秉忠洞究術數晚交許衡尤粹於義理之學爲人剛明簡重凡所陳言未嘗不以仁義尤以引薦人才爲己任數忤權倖而得喪一不以經意身後家惟藏書數萬卷累贈推誠同德佐運功臣太師開府儀同三司上柱國魏國公諡忠宣子晏官御史中丞贈陝西平章政事魏國公諡文靖杲侍儀引進使

宋子貞字周臣潞州長子人也性敏悟好學工詞賦弱冠試補太學生金末潞州亂子貞走趙魏間宋將彭義斌辟爲安撫司計議官義斌沒子貞率眾歸東平行臺嚴實實以爲詳議官兼提舉學校太宗四年實戍黃陵金人悉力來攻與戰不利敵勢頗張曹濮以南皆震時訛言金兵且大至人情洶懼子貞請於實斬揚言者首以令諸城境內乃安旣而汴梁下飢民北徙餓殍盈道子貞多



方振救全活萬餘人金士流寓者悉周給且薦用之拔名儒張特立劉肅李昶輩於羈旅與之同列四方之士聞風而至故東平一時人材多於他鎮七年太宗命子貞爲行臺右司郎中中原略定事多草創行臺所統五十餘城州縣之官或擢自將校及起民伍率昧於從政多爲貪私以病民子貞倣前代觀察采訪之制命官分三道糾察官吏立程式定期會黜貪惰獎勤廉始有紀綱民得蘇息東平將校占民爲部曲戶謂之脚寨擅其賦役子貞令悉歸州縣人以爲便實卒子忠濟嗣尤敬子貞請於朝授參議東平路事兼提舉太常禮樂子貞作新廟學延前進士康煜王磐爲教官招致生徒俾習經藝齊魯儒風爲之一變憲宗九年世祖南伐召子貞至濮問以方略對曰本朝威武有餘仁德未洽所以拒命者特畏死耳若投降者不殺脅從者勿治則宋之郡邑可傳檄而定

也世祖善其言中統元年授益都路宣撫使未幾拜右三部尙書李壇叛詔參議軍前行省事子貞單騎入濟南觀壇形勢因說丞相史天澤曰壇擁眾東來坐守孤城宜增築外城防其奔突彼糧盡援絕不攻自破矣議與天澤合遂禽壇子貞還上書陳便宜十事大略謂官爵人主之柄選法宜盡歸吏部律令國之紀綱宜早刑定監司總統一路乞選公廉有才德者爲之州縣官相傳以世非法賦斂民窮無告宜遷轉以革其弊又請建國學教胄子敕州郡提學課試諸生二年一貢舉帝命中書第次施行之至元二年始罷州郡官世襲遣子貞與左丞相耶律鑄行山東遷調所部官還授翰林學士參議中書省事奏請頒俸祿定職田從之俄拜平章政事復陳時務十二策帝頗憾用子貞晚未幾請老帝惜其行十一年懇辭乃允特敕中書凡有大事卽其家訪問子貞私居每

聞朝廷事有未便必封疏上奏愛君憂國不以進退異其心薨年八十一子渤字齊彥有才名官集賢學士

論曰宋祁言馬周以一介草茅言天下事若素宦於朝明習憲章者以為殆王佐才也惟中壁文謙子貞皆出寒賸而能以學行治術見稱於時文謙子貞且創定制為一代法非馬周之流耶亦會際開國之感運而然也璧忌廉希憲頗失純白然有膽略亦政事才也故四人者皆元初良輔矣得唐文皇始終用之使盡其長其不為周也歟

門人李安淑 刊

門人曾 緇襄校

門人曾士琮詳校

元書卷四十五

